


10


2543





6842  
114

金石學錄四卷



光緒三十四年  
錫贈李氏刊本已不多見  
此書可重付梓  
案也越三年辛亥  
宣南宮邸  
檢書補記



積學書藏



積學書藏



金石學錄

一函 一册 书号 6842

積學書藏

金石學錄序


古來言金石者以其可證經典之同異正諸史之謬譌而法  
物文章皆可為多識之助故好古嗜奇之彥莫不博蒐而爭  
寶之顧三代時金多而石少漢魏以後石多而金亦無足甚  
重商周銘詞其載於經傳者皆轉易今字而古倉籀之文不  
可見漢許叔重撰說文解字山川鼎彝之銘及秦刻石字竝  
加摭採此古文之賴以僅存者也自是厥後吉金樂石間有  
流傳講求者亦不乏人至宋而歐陽薛呂洪王趙諸氏藏獲  
愈富始摹搨辨識著錄成書沿至我朝通儒輩出人才特  
盛前古之珍彝寶器與夫殘碑斷碣亦日出於土田榛莽間  
罔弗精審詳稽識大識小各勒一編縱世閱千年經風霜兵

燹不免金銷石泐之憾而有後人以為之輯錄則往古之奇  
文異字得以長存宇宙而不朽矣從弟金澗性耽金石手所  
搜羅甚夥暇考前人之編簡訂異辨疑不啻同堂質問而所  
夕肆力於其中爰自三代以來至漢魏六朝唐宋元明以及  
本朝諸家凡為金石之學者得四百餘人並有著述以傳  
於世即志一隅說一事無不備見於錄亦已綜覽而無遺漏  
焉夫疇人印人皆有為之傳者誠以其專精致力不可使泯  
滅無聞而况金石之物世所寶貴其衰聚論釋殫心尤勤則  
由其人以求其書由其書以考古之鐘鼎敦彝爵卣鬲之  
器遐陬僻壤高原古刹之碑刻無不可以供人之摩挲資人  
之津逮而作述之精神不至沈蕪於後世且經史之同異繆

積學書藏

論亦足藉以證明是則金澗之用意可不謂深且厚歟余故  
綴數語以序其端

道光二年歲在元默敦牂辜月當孫實甫撰




積學書藏


金石學錄例目

嘉興李遇孫輯

凡例

一閩百詩徵君潛印劄記舉古之為金石學者七事攝尊象  
 尊律麻志儒林傳地理志銅棺秦權是也王西泚充祿作  
 錢詹事金石跋尾序續舉十一事議鼎銘考父鼎銘孔悝  
 鼎銘嘉量銘柏寢銅器美陽鼎銘金人銘丹書銘始皇刻  
 石大邗城碑柏人城西門碑是也由兩先生之說而推廣  
 之自經典史漢迄唐五代列為一卷蓋金石之學至宋而  
 盛唐以前所說者不過一鱗片甲耳然溯厥原起雖得一  
 二勝於什伯亦以知吉金貞石之取重於世非一日矣





章氏藏書	書	名	冊數	總號
金石學錄	12	12	1	126
		乙		

積學書藏

金石學錄例目

凡例

嘉興李過孫輯



一閩百詩徵君潛印劄記舉古之為金石學者七事攝尊象  
 尊律麻志儒林傳地理志銅棺秦權是也王西泚充祿作  
 錢詹事金石跋尾序續舉十一事說鼎銘考父鼎銘孔悝  
 鼎銘嘉量銘和寢銅器美陽鼎銘金人銘丹書銘始呈刻  
 石大邗城碑柏人城西門碑是也由兩先生之說而推廣  
 之自經典史漢迄唐五代列為一卷蓋金石之學至宋而  
 盛唐以前所說者不過一鱗片甲耳然溯厥原起雖得一  
 二勝於什伯亦以知吉金貞石之取重於世非一日矣

一金石至宋歐陽氏而始集其成文忠以還長膺德甫景伯  
順伯諸公無不專門名家研精考究金元寥寥數人至明  
之元敬升庵子函允伯諸公出又皆博覽旁搜立言有據  
自宋迄明列為一卷已得百數十人俱聞歐陽氏之風而  
興起者也

一是錄洛遵四庫館通例以

御纂諸書冠於

國朝著述之首俾海內學古之士知所宗仰焉

一國朝亭林竹垞兩公出篤嗜金石鉤稽弗遺到然於歐  
薛趙洪之上由是虛舟竹汀西泚山夫單谿授堂述庵雲  
臺諸先生繼起著述等身推勘深至各成不朽此文忠以  
來金石學之大宗也列為二卷自國初至近時又得二

### 積學書藏

百餘人超軼宋金元明四代可謂盛矣

一古金以款識為重王光祿謂閻徵君所舉王肅劉杳孟康  
皆無文字則精確者唯四事耳其言誠然是以光祿所引  
左氏傳二條外今僅增禮至殺國子銘一條晉語商銘一  
條其餘左氏所載鐘鼎之屬不勝枚舉皆無文字不錄祭  
統孔悝鼎銘外增大學湯盤銘史記相寢銅器漢書美陽  
鼎外無所增唯後漢書補仲山甫鼎一條史漢以後史書  
多載寶鼎出之文銘俱不傳唯開元十三年萬年人獲寶  
鼎四有垂作尊鼎銘十二字咸平三年乾州獻古鼎有維  
六月初吉銘二十一字於事無所證亦不錄北宋後搜獲  
甚多皆見之金石書更無庸專錄一器之存亡矣

一錄諸家姓氏而各詳其所著之書因書以見人也凡專錄  
一地僅釋一碑或文集散見劉記偶及無不搜羅同登是  
冊即著述未傳而其人素稱好古為諸家所引重者亦錄  
其姓氏兼有藏弄諸物銘心絕品間以所知者附錄一二  
則因人以及物也  
一古甄瓦頭亦類於石刻由此可見古人文字其著錄起於  
宋趙洪二家國初朱竹垞跋寶鼎碑林吉人圖甘泉瓦  
其物尚希有近時瓦當日出於西土而吾浙之雲谿武原  
二處山巔海濱搜拾更多皆有年號可據好古者收藏而  
加以考訂亦竝錄之  
一金石諸物僅以詩歌傳者不錄

### 積學書藏

一評論法帖之人不錄  
一專以錢譜印譜傳者不錄  
一諸公爵里事蹟不待是書而見槩從闕略蓋前代之人班  
班在史冊并有著述流傳可考近時人或稍加詳其於官  
銜別字隨筆記載即居址亦偶及之皆未能一例也  
一附見之人或師友或子姪或同釋一物同居一地則牽連  
書之  
一一人所見難免漏遺儻有續聞當再補輯

目錄

卷之一

左氏傳

禮至銘

護鼎銘

考父鼎銘

周禮

嘉量銘

禮記

孔悝鼎銘

湯盤銘

大戴禮

丹書銘

國語

商銘

家語

積學書藏

金人銘

史記

石棺銘

始皇刻石

柏寢銅器

漢書

美陽鼎銘

後漢書

燕然山刻石

仲山甫鼎

五經文字刻石

謝承後漢書  
袁宏後漢記

魏

孟康

張晏

王肅

晉

陸機

梁

元帝

劉之遴

後魏

崔光

酈道元  
條二

北齊

魏收  
條二

晉灼

劉杳

江式  
劉芳

楊銜之

顏之推  
條二

積學書藏

隋

劉焯  
炫

唐

魏徵

章懷太子賢

張懷瓘

韋續

司馬貞

鄭承規

五代

尹玉羽

蘇勗  
虞世南 褚遂良 歐陽詢

李嗣真

竇泉  
蒙

徐浩  
封演 杜甫 韋應物 韓愈 鄭餘慶

張參  
唐元度

劉昫  
張昭遠 宋祁

宋

郭忠恕

劉敞

曾鞏

蘇軾

孫覺

胡宗愈 蘇望

呂大忠 黎持

李公麟

田棨 崔君授

歐陽修 裴揚南仲

陳文寶 李處巽申屠仲馬

司馬池 向傳師

黃庭堅

鄭昉

呂大臨

黃伯思

游師雄

沈括

積學書藏

王黼

翟耆年

董道 朱越石

方勺

劉涇

蔡條

葉夢得

洪适 石熙明張縝

李壽

王厚之 石公弼半良史朱敦儒劉爰張韶洪遵秦禧

羅泌

薛尚功

朱長文

吳曾

胡世將

蔡珪

晁博

趙明誠

劉侏

席益

洪邁

李丙 張湜

積學書藏

姚寬

朱子

王侏

王象之

陳思

鄭樵

婁機

程大昌

史子堅

繩祖

晁公武

張真范成大

趙彥衛

周必大

曾宏父

趙希弁

楊文昂

施宿

姜夔

張樵

陳榘

陸游

張世南

趙希鵠

王應麟

李燾

朱翊

周密

金

耶律隆

元好問

元

王惲

王楫

虞集

申屠致遠

趙孟頫

徐頤

吾邱衍

潘昂霄

張淑

吳萊

潘迪

陸友

單禧

鄭杓

劉有定

梁有

姚桐壽

明

陶宗儀

盧熊

宋源

朱珪

趙古則

吳訥

宋廷佐  
楊一清

王世貞

孫鑑

楊慎

都穆

顧元慶

曹昭

張應文

朱存理

趙琦美

郎瑛

文徵明

沈鎰

楊時喬

王佐

陳暉

葉盛

王行

積學書藏

趙崑

安世鳳

盛時泰

顧啟元

孫克宏

華夏

豐道生

范欽

項元汴

周錫珪

趙宦光

均

歸有光

郭宗昌

東雲駒  
雲離

來濬

徐獻忠

王家瑞

陳鳳梧

于慎行

孫楨

陶滋

汪珂玉

楊嗣昌

錢受徵

吳惟英

于奕正

卷之三

國朝上

欽定西清古鑑

御製重刻石鼓文序

孫承澤炯

黃宗羲

曹溶

顧炎武潘耒

吳任臣

黃虞稷

朱彝尊馬思贊曹曰胡沈翼

劉凝趙師尹朱茂皖

張紹王瑛

馬驥

傅山

王宏撰

積學書藏

鄭蘆張大風顧與治

王士禎

姜紹書

萬斯同

閻若璩

臧琳

葉奕色

程邃

鍾淵映

毛先舒

葉封

林侗佶

顧苓

葉萬

孔尚任

高士奇

宋莘

景日昫

龔翔麟梁同書馬履泰趙之琛

楊繩祖

周在浚

鄭元慶

顧仲清

陳鵬年

查慎行

王著 王傑

蔣衡

何琦

翁萬年

顧藹吉

褚峻

吳玉楮 徐堅

厲鶚

陳奕禧

汪士鋐

吳涵

王澍 陳焯

秦伯喈

楊寶

何焯

萬經

牛運震

杭世駿 趙信

丁敬傳

積學書藏

金農

李允映 金介復 王籍渠

汪師韓

姜任修

黃華蕃

盧文弨

嚴長明 觀

王鳴盛

錢載 姜實節 伊湯安沈 大成 胡虔 江德地

馮浩

畢宏述 星海 梧

倪濤

全祖望

齊召南

汪由敦

錢大昕

翁方綱 樹培 陸恭

汪孟錫

朱筠 周槃

紀昀 莊述祖

周春

董金甌 菽憲

國朝下

畢沅

黃叔瓚

劉青黎

武億

王昶

謝啟昆

石韞玉

孫星衍 顧廣圻李昭德吳修

洪亮吉

阮元 朱為弼江鳳彝

黃易 李東琪李克正高正炎

桂馥 顏崇榘沈心醵

孔繼涵

錢大昭 東垣同

程瑤田

積學書藏

秦恩復

沈可培 可均

金德興 陳廣凝蔡英

朱楓

程敦

申兆定

巴慰祖

汪中 俞思謙

張損

陳以綱

陳鱣 陳均徐紹曾許棟

丁杰

李文藻

李調元

汪照

王復 童鈺鍾敬濤

陸超曾

汪德量 孔廣森樊明徵汪肇龍吳穎芳

趙秉冲

段玉裁

邢澍

吳騫

張燕昌 開福吾進  
錢本誠

錢玷

吳東發

溫汝遂 潘有為

江藩 江聲

朱文藻

趙魏

陳豫鍾

段松岑 李廓

聶鉞

瞿中溶 許宗彥

周廣業 費士璣

曹東鈞 文鼎姚  
江春

朱邦經

吳文溥

張廷濟 灝沅  
王銘壽

宋保醇

黃錫蕃

陳鴻壽

嚴可均

張鑑

徐熊飛

積學書藏

李富孫 鄧磨

何元錫

翁廣平

嚴杰 趙春沂孫同元  
金廷棟洪震煊

汪家禧

錢泳

司馬亶

李聘

戴光曾

斌良 素訥

馮登府

鍾振富 岳洙傳

馬鉉

馬陳潮

劉喜海 葉志詵

阮亨

陳經 丁口王  
釵口

徐同柏

錢玫

周中孚


龔時珍

徐渭仁 李琦  
嘉梅益  
徵紀大復

陳璜夏世堂

姚觀光錢天樹

馮雲鶴



積學書藏

金石學錄卷一

嘉興李過孫輯

左氏傳

僖公二十五年衛人伐邢二禮從國子巡城掖以赴外殺之禮至為銘以自誇其功以證其不知恥而詐以滅同姓之

國

昭公三年叔向對晏子引饒鼎之銘以證樂不可極

昭公七年孟僖子引正考父之鼎銘以證明德後必有達者

周禮

考工記臯氏為量引嘉量銘以證量之制

禮記

祭統篇引孔悝鼎銘以證作銘之義

大學篇引湯盤銘以證日新之義案古人唯金器上刻銘國語商銘或云商鼎銘左傳禮至銘註云銘功於器後世所出比干銅盤銘及今傳散氏銅盤銘文字奇古識者以為非三代以下物則銅盤之有銘由來已久以此比例湯盤亦金器也

大戴禮

武王踐作篇尚父引丹書之言以戒王案丹書之訓未聞刻於何器因王西泚光祿所引存之

國語

晉語引商衰之銘以證嗛嗛之德為不足就嗛嗛之食為不

### 積學書藏

足狃

家語

觀周篇孔子觀周入右楹之廟有金人焉三緘其口而銘其背云云以證毋多言之戒

史記

秦本紀載武王伐紂飛廉為紂石北方還無所報為壇霍太山而報得石棺銘以證處父之不與亂

始皇本紀二十八年始皇東行郡縣上鄒繹立石與魯諸生議刻石頌秦德此為嶧山刻石史公不錄其文今見鄭文寶摹本史公所錄者泰山刻石琅邪臺刻石之眾刻石之眾東觀刻石碣石刻石會稽刻石及二世刻石凡此皆以

見史公之留意金石藉碑以證秦之巡游無度爾

封禪書李少君見上上有銅器問少君少君曰此器齊桓公十年陳於柏寢已而按其刻果齊桓公器

漢書

郊祀志是時美陽得鼎獻之下有司議多以為宜薦見宗廟如元鼎故事張敞好古文字案鼎銘勒而知為周鼎

後漢書

竇憲傳登燕然山去塞三千餘里刻石勒功紀漢威德令班固作銘云云迺遂封山刊石昭銘上德

又竇憲傳南單于於漠北遺憲古鼎容五斗案其銘而知仲山甫鼎

### 積學書藏

靈帝本紀熹平四年春三月詔諸儒正五經文字刻石立於太學門外又見蔡邕傳張馴傳儒林傳崔者傳蔡邕張馴兩傳作六經謝承後漢書碑立太學門外瓦屋覆之四面開障開門於南河南郡設吏卒視之袁宏後漢紀熹平四年春三月五經文字刻石立於太學之前

魏

孟康註漢書律歷志據漢章帝時零陵文學奚景於冷道舜祠下得白玉琯古以玉作管不但竹也以證漢志之說不盡然

張晏註漢書儒林傳案碑而知伏生名勝

王肅釋擗尊據太和中魯郡於地中得齊大夫子尾送女器

有犧尊純為牛形以證其羽婆娑然說非是見毛詩閟宮疏

晉

陸機洛陽記載洛城南開陽門外太學漢石經諸碑

晉灼註漢書地理志魏郡黎陽據山上碑所云縣取山之名取水在其陽以為名以證地之名黎不名黎陰也

梁

元帝著碑英一百二十卷見所撰金樓子案此為四庫館

提要所引今鮑氏知不足齋所刊金樓子第五卷著書篇

止載碑集十秩百卷元註云付蘭陵蕭賁撰鮑廷博案云

隋經籍志梁元帝撰雜碑二十二卷碑文十五卷此作百

### 積學書藏

卷疑至隋時已失其全又另載詩英一秩十卷鮑氏所刊雖亦從永樂大典錄出而輾轉鈔寫不免舛錯幸有四庫本之可正其謬也此實為金石學之祖惜其書不傳

劉杳嘗與沈約坐語及宗廟犧尊約云鄭元畚張逸謂為畫

鳳凰尾婆娑然今無復此器則不依古杳曰此言未必可

安古者尊彝皆刻木為鳥獸鑿頂及背以出內酒先引子尾送女

器與王晉永嘉賊曹窋於青州發齊景公冢又得二尊形

亦為牛象皆古之遺器知匪虛也并以證象骨飾尊之說

非是見南史

劉之遴好古愛奇在荊州聚古器數十百種有一器似甌可容一斛上有金錯字時人無能知者又獻古器四種於東

宮其第一種鏤銅鳴夷榼二枚兩耳有銀鏤銘云建平二年造其第二種金銀錯鏤古罇二枚有篆銘云秦容成侯適楚之歲造其第三種外國深灌一口銘云元封二年龜茲國獻其第四種古製深盤一枚銘云初平二年見梁書後魏

崔光於明帝神龜元年以漢魏經石彌減文字增闕表請遣國子博士一人料閱碑牒所失次第量厥補綴乃令國子博士李郁與助教韓神固劉燮等勘校石經其殘缺者計料石功并字多少欲補治之後靈太后廢遂寢

江式延昌中上表內說石經云蔡邕採李期曹喜之法為古今雜形詔於太學立石碑刊載五經題書楷法多是邕書

### 積學書藏

後開鴻都諸方獻篆無出邕者魏建三字石經於漢碑西其文蔚煥三體復宣又劉芳經學精洽學者以石經文字往質芳音義明辨時號劉石經俱見北史

酈道元註水經四十卷凡引漢碑百魏碑二十晉及宋魏稱是洪文惠楊升庵俱輯碑目另刻

水經註青州刺史傅宏仁說臨淄人發古冢得銅棺前和外隱起為隸字言齊太公六世孫胡公之棺也惟三字是古餘同今書以證隸自出古非始於秦也此條闕潛印所引故另列

楊銜之著洛陽伽藍記五卷引寺中所有碑志約二十條并及漢魏石經

北齊

魏收撰魏書仿善長水經註於地形志郡縣下每引漢魏以來石刻

魏書衛操傳桓帝崩後操立碑於大邗城南以頌功德時晉克

熙元年秋也皇興初雍州別駕雁門段榮於大邗掘得此

碑文雖非麗事宜載焉故錄於傳案充熙元年至皇興初

已三百餘年掘得此碑作史者據以入傳金石之不磨滅

如是碑文一千餘言此條王西泚所引故另列

顏之推家訓書證篇據秦時鐵梅權旁有銅塗鐫銘詔丞相

狀縮古隸文知俗作隗林之當作隗狀也

又書證篇相人城東北有一孤山闕駟十三州志以為舜納

於大麓即此山上有堯祠世俗或呼為宣務山或呼為虛

積學書藏

無山顏氏據城西門內漢碑有銘土有囿務王喬所仙知

俗名宣務山之當名囿務山也案顏氏據碑以證山名若

闕駟只言相城人東北孤山為舜納於大麓地與碑無涉

王西泚引此條云相人城西門碑闕駟且據以為即舜納

於大麓之迹非是二條一為闕潛邱所引一為王西泚所引故並列

隋 劉焯曾於開皇六年奉勅與劉炫考定漢魏石經案隋經籍

志云後漢鐫刻七經著於石碑皆蔡邕所書魏正始中又

立一字石經相承以為七經正字後魏末齊神武執政自

洛陽徙於鄴都行至河陽值崩岸遂沒於水其得至鄴者

不盈大半至隋開皇六年又自鄴京載入長安置於祕書

內省議欲補緝立於國學尋屬隋亂事遂寢廢營造之司  
因用為柱礎據此則焯烜雖奉是勅實未及考定也

唐

魏徵於貞觀初為秘書監臣收聚石經十不存一其相承傳  
拓之本猶存秘書府見隋經籍志又韋述西京新記魏徵  
參詳考驗蔡邕三字石經凡十數段請於九成宮秘書監  
內置之後天后移於著作院

蘇勗記石鼓云世咸言筆迹存者李斯最古不知史籀之迹  
近在關中虞褚歐陽共稱古妙見元和郡縣志所引據此  
則知虞世南褚遂良歐陽詢莫不稱述石鼓矣

章懷太子賢註後漢書鄧騭傳遭元元之災引岐陽石鼓文

### 積學書藏

凡重言者皆為二字

李嗣真著書後品贊云蒼頡造書鬼哭康廩史籀堙滅陳倉  
藉甚秦相刻銘爛若野錦鍾張義獻超世逸品

張懷瓘著書斷其論籀文引七畧云史籀者周宣王史官教  
學童也與孔氏壁中古文異體甄鄴定六書二曰奇字是  
也其跡有石鼓文存焉蓋諷宣王畋獵之所作今在陳倉  
李斯小篆兼采其意史籀籀文之祖也贊曰體象卓然殊  
今異古落珠落玉飄飄纓組蒼頡之嗣小篆之祖以名稱  
書遺跡石鼓後神品中敘史籀又云作籀文其狀邪正體  
則石鼓文存焉

韋續集五十六種書體并序內第十五大篆書云周宣王史

史籀所作也亦曰籀篆石鼓文是也見陳思書苑菁華其  
自序云後漢東陽徐安于搜諸史籍得十二時書皆象神  
形也又加二十三體共定五十有六則所云石鼓文者亦  
似前人之說續特述之耳可見石鼓之指為史籀由來久  
矣

徐浩著古蹟記有史籀石鼓文並為曠絕之言又封演聞見  
記第七卷有石鼓一條有目而缺文唐人稱石鼓者約九  
家其見諸論說皆以為宣王時史籀作也他若歌咏所及  
杜甫有陳倉石鼓久已訛之句韋應物韓愈皆賦石鼓歌  
歐陽文忠去韋氏以為周文王之鼓至宣王刻詩今案韋  
詩起句云周宣大獵兮岐之陽又云迺是宣王史臣史籀

### 積學書藏

作並不言文王時物或曰文忠所見是周文大獵兮岐之  
陽豈傳本有異耶然翟耆年籀史所引韋詩亦作周宣大  
獵兮岐之陽則文忠自是誤讀爾至昌黎直以為宣王之  
鼓因思石鼓為周之遺寶晦於前世致後之疑者不少幸  
有唐儒盛稱之又得韋韓兩公作歌以傳之定為宣王時  
物縱聚訟紛紛亦不得置其喙矣其有功於金石甚大又  
昌黎石鼓歌有瓊苞席裏可立致十鼓祇載數駱駝聖恩  
若許留太學諸生講解得切磋等句有此願而未果至鄭  
餘慶始取置鳳翔孔廟則鄭君遷徙之功亦不可沒故備  
錄之

司馬貞史記索隱於高祖本紀據班固泗上亭長碑知母媪

當作母溫

張參唐大歷十年詳定五經書於論堂東西廂之壁是書不獨參考說文並能存漢石經字體開成中唐元度依舊本撰新加九經字樣一卷請附五經文字之末兼請於國學牀立石經今長安所存石經雖鄭輩輩成之其議實發於元度也後二書同刻石附九經後

鄭承規著碧落碑釋文碧落碑唐高宗總章三年立至懿宗咸通十一年越二百餘年之久承規始有釋文但云奉命書亦非其所創也

五代

尹玉羽為劉鄩幕吏有保護開成石經功自鄭輩等勒石壁

### 積學書藏

九經一百六十卷天祐中築新城石為韓建所棄鄩守長安玉羽請輦入城鄩謂非急務玉羽給曰一旦敵兵臨城碎為夫石亦足以助戰鄩然之移置尚書舊省後宋元祐中呂大忠領漕曰始克盡列於學黎持撰新移石經碑記安宜之書之倘非玉羽請移於前其石久亡後人即能好古亦無從致力則今日唐石經之燦然具備者皆玉羽之功也玉羽長安京兆人著有自然經五卷武庫集五十卷鄩辟為保大軍節度推官仕後唐至先祿少卿

劉昫同張昭遠撰唐書載開成二年宰相判國子祭酒鄭覃進石壁九經一百六十卷時上好文章以經義啟導遂奏置五經博士依漢蔡邕刊碑立於太學創立石壁九經又

鄭覃傳覃奏起居郎周墀水部員外郎崔球監察御史張  
次宗禮部員外郎孔溫業校定九經文字旋令上石至宋  
仁宗時宋祁歐陽修等奉勅改修唐書載鄭覃以經籍刊  
謬願與鉅學鴻生共力讐刊準漢舊事鏤石太學乃表周  
墀等是正其文刻於石又曰高重為祭酒共覃刊定九經  
於石崇宋祁雖宋人以類附見於此歐陽修另見後

金石學錄卷一終

積學書藏

金石學錄卷二

嘉興李過孫輯

宋

鄧忠恕著汗簡六卷案汗簡本小學書學篆籀者宗之然所  
引楊氏阡銘楊大夫碑張廷珪劍銘樊先生碑碧落碑天  
台碑孔子題吳季札墓文字華岳碑滅貝邱長碑王庶子  
碑滑州趙氏石額古虞鄉碑陳逸人碑濟南碑文無錫縣  
碑彌勒像碑陵歎臺銘銀牀頌元德觀碑不下二十種則  
其於金石頗有采考古者藉以見古刻之文字焉故錄  
之

歐陽修著集古錄跋尾十卷李季子棐撰集古錄目錄二十卷

金石之文多至千卷跋尾四百餘篇文忠得古器銘必屬  
楊南仲釋其字南仲學問精博與劉原父齊名手書石經  
七十五卷見宋史藝文志

劉敞在長安得先秦古器數十愛其款識文字奇古因以考  
知三代制度與先儒所說不同者著先秦古器記

鄭文寶摹刻嶧山碑以徐鉉摹本於淳化四年刻於長安國  
學嶧山翻本陳思孝云有七本今止存鄭本及金陵李處  
巽本紹興中屠嗣本相較惟鄭本尚有古意七本中有青  
社本為李仲垣所刻時阜昌甲寅也載于欽齋乘又有元  
祐中縣令張文仲刻本見趙子函說

曾鞏著南豐類稿五十卷末錄金石跋僅十四則史言其嘗

積學書藏

集古今篆刻為金石錄五百餘卷惜其書不傳類稿中存  
一序

司馬池愛車古刻石鼓日鄭餘慶遷鳳翔孔子廟後經五代  
之亂又復散失池知鳳翔復輦至府學之門廡下而亡其  
一并有偽為一鼓者皇祐四年向傳師搜訪民間足之蓋  
至是真鼓始復

蘇軾賦鳳翔八觀有石鼓歌詛楚文二篇紫桃軒雜綴云東  
坡有手鉤石鼓文篆籀全音釋備遠勝潘迪等所錄案此  
即楊升庵偽托之本不足為東坡述也宋人自死陵東坡  
樂城賦石鼓後作者不絕例不載唯東坡直繼昌黎作定  
為周宣王物殊有關係故并及之

黃庭堅山谷集中雖多碑帖題跋論書法者居多如廟堂碑  
爭坐位帖之類略有考訂又嘗稱石鼓文如圭璋特達非  
後人所能贗作又詛楚文亦有釋文

孫覺守吳興時作墨妙亭於府第之北取自漢以來古文遺  
刻以實之凡三十餘通東坡有墨妙亭記蔣燦書之今其  
石以府治卑濕用填淤泥古刻遂不復見

鄭場集荆襄川蜀金石刻為五路墨寶既錄碑之全文附以  
已說歐陽集古攷究未備者間有辨正類為數巨冊考證  
良備悉上秘府業端字叔竄此書不傳見清波雜志

胡宗愈知成都時重刻漢石經四千二百七十字有奇三體  
石經八百十九字又蘇望於皇祐癸巳得左傳拓本三體

### 積學書藏

石經取其完者刻之凡八百十九字題曰石經遺字業宋  
史宗愈字完夫朱氏經義考杭氏石經考異引稱胡內翰  
元質獨萬氏石經考作宗愈考刻漢石經止有胡內翰一  
人必有一誤予姑從萬氏石經考錄之

呂大臨輯考古圖十卷自御府之外三十六家所藏古器物  
皆圖而錄之

呂大忠領漕陝右時命學官黎持將尹玉羽所移之唐石經  
徙置于府學之北墉洗別塵土補銅殘缺分列東西次比  
而陳列焉明皇注孝經及建學碑則立之於中央顏褚歐  
陽徐柳之書下迨徧傍字源之類則分布於庭之左右於  
是黎持作京兆府府學新移石經記時元祐五年九月二

十日

黃伯思史稱其好古文奇字洛下公卿家商周秦漢彝器款識研究字畫體製悉能辨正是非道其本末遂以古文名家予訥合其法帖刊誤及金石刻論述編為三卷名曰東觀餘論曾著博古圖說十一卷後之修博古圖者頗采取焉

李公麇史稱其好古博學多識奇字自夏商以來鐘鼎尊彝皆能考定世次辨測款識聞一妙品雖捐千金不惜也善畫嘗取平生所得暨其聞睹作為圖狀說其所以而名之曰考古圖及大觀初廼倣公麇之考古作宣和殿博古圖游師雄作唐太宗昭陵圖記太宗昭陵在醴泉縣九峻山當

### 積學書藏

時陪葬之盛典夫刻蕃酋之形琢六駿之像以旌武功列於北闕規模宏大自朱梁盜發而後日就廢毀碑石亦剝落師雄於元祐七年權陝西轉運副使命邑官刊圖於太宗廟以廣其傳并題詞于上先於四年題昭陵六駿碑亦立石于太宗廟

田槩輯京兆金石六卷元豐五年王欽臣為序皆記京兆府縣古碑所在其書不傳陳氏寶刻叢編屢引之又據錢詹事序山左金石記引宋崔君授亦有京北石刻

沈括著夢竊筆談第十九卷器用門引黃彝銅鉦及弩機壘匝之屬皆有款識考證

王黼輯宣和博古圖錄三十卷雖辨證多疎謬然古銘字古

器形尚存考古者有取焉

薛尚功著鐘鼎款識二十卷鈎摹古器銘詞為之牋釋訂論考異具有辨證

翟耆年著籀史俱採錄金石遺文各種之下皆附論說括其梗概其書不能如薛尚功之備載篆文而考述原委較薛為詳惟於岐陽石鼓不深信為史籀作則其識見不如尚功耳

朱長文著墨池編二十卷敘述歷代著作窮字學之原委末附文房器用其十七卷十八卷專敘碑刻自周秦起唐碑止不下千通其書謨人及年號地址即注於碑下獨唐碑以類相從分墓銘讚述佛家道家祠廟宮宇山水題名藝

### 積學書藏

文傳模凡十門然伯原此書以書法為主是以第十六卷雖專錄集古跋尾而亦不全錄自云諫論及書者則錄之可知其用意所在也

董道著廣川書跋十卷多考訂金石之文據左氏傳成有岐陽之蒐以石鼓為成王時作又載朱越石與兄書論石經甚詳惟漢魏一字三字之分尚未明晰

吳曾著能改齋漫錄力辨石鼓文出於周宣王史籀大篆引蘇勗載記等說以為證

方甸以石經殘碑在洛陽張景元家世傳蔡中郎書未知何據遂詳考之仍隋經籍志之說以一字為魏石經不知經籍志雕本相沿為三為一朱竹垞太史經義考辨之在經

籍志之序漢魏次第本不誤耳至公羊碑有馬日碑等名  
乃云魏世用其所正定之本因存其名洪文惠嗤其為謬  
論信夫旬是跋載其凡勺所作泊宅編

胡世將著資古紹志錄多考訂金石文其所藏石鼓文在集  
古之前比永敘所見四百六十五字僅益九字宋儒所見  
石鼓文並無全本愈知楊升庵所云從李文正家得唐拓  
本及見東坡之本皆偽託耳

劉涇輯成都刻石總目三秋時元祐中蔡京帥成都以意授  
涇纂府縣碑板幢柱自東漢初平迄偽蜀廣政凡二百六  
十八又成都有漢王稚子闕作文記之得以永存其文載  
國朝成都通判陳祥裔蜀都碎事中

### 積學書藏

蔡珪輯金石遺文

蔡條著古器說見鐵圍山叢談歷敘前代得古器之可貴至  
宋劉原父倡於前歐陽公繼之由是李伯時繪圖以傳及  
大觀初徽伯時所作成宣和殿博古圖凡所藏大小禮器  
已五百有幾政和間為最盛尚方所貯至六十餘數百器  
時所重者三代之器若秦漢間物非殊特不收及宣和後  
又皆貯錄且累數至萬餘而宣和殿後又劫立保和殿左  
右有稽古尚古博古等閣以貯之俄過都邑傾覆悉入金  
營散落不存惟圖錄規模班班尚在可以流傳不朽耳其  
言大畧如是

邵博著聞見後錄三十卷內載近年洛陽張氏發地得石十

數蔡伯喈隸尚書禮記論語各已壞闕論語多可辨每語必他出至十數語則日凡章若干

葉夢得取古碑所載與史違誤者為金石類考五十卷其所著避暑錄話中載劉原甫識赫連勃勃所鑄龍雀刀及韓丞相汝玉家藏王莽新始建國天鳳上戊六年所造銅料甚有考訂

趙明誠著金石錄三十卷聚古碑二十卷仿歐陽集古錄例編排成秩凡目錄十卷跋尾二十卷紹興中其妻李清照表上於朝

洪适著隸釋二十七卷續二十一卷漢碑之存者以今文寫之而為之釋又為世代譜及物象圖碑形式悉具之魏初

### 積學書藏

近古者亦附焉又同時有石熙明聚碑最富文惠假得成此書石氏曾摹熹平石經文惠亦有蓬萊閣漢石經之刻計千九百餘字張縯有石經跋頗於隸續之外有所考訂又謂以三體參校其文而書丹於石則定為隸後儒稱其說為獨得

劉球著隸韻十卷引漢碑連碑陰共百六十通足資考證宋時有石刻為德壽殿本近維揚秦敷甫太史得之重墨諸版稱其采獲之勤編次之多闡洪氏之緒餘導字原之先路雖不無珠璧處然未可以微類掩其全璧也

李壽字異品紹興中為雅州郡從事即於雅州得漢碑蜀郡掾治道記其碑紀年號云建武中元二年與范紀袁宏後

紀司馬溫公通鑑不冠建武止稱中元異器考司馬彪  
祭祀志改建武三十二年為建武中元元年合之碑記正  
同知官書累經校定妄意刪去宋鄭公嘗輯紀年通譜曾  
疑紀志不合惜諸大儒未見此碑不及改正永叔著集古  
錄謂可正史傳缺謬惜此記又不使永叔見之也

席益修葺蜀石經作記畧云偽蜀廣政七年其相毋昭裔按  
雍都舊本九經命平泉令張德釗書而刻諸石本朝因禮  
殿以祀孔子故蜀帥尚書右丞胡公宗愈作堂於殿之東  
南隅以貯石經益又補刻孟子十四卷晁公武謂其多誤  
字

王厚之著復齋碑錄又著石鼓文詛楚文音施宿稱其稽古

### 積學書藏

成癖至忘饑渴石鼓考辨尤為精詣又紹興中秦相子燾  
居賜第十九年日治書畫碑刻因輯所藏鐘鼎款識一冊  
後歸順伯每款鈐以復齋珍玩厚之私印且為釋文疏其  
藏弄之所此冊輒轉流傳國初曹倦圃朱竹垞馬銜齋  
藏後今為阮氏琅嬛僊館所刊又纂積古齋跋云王氏款  
識五十九種皆復齋所輯搨本中有畢良史牋識十五器  
迺秦燬之物此外周師旦鼎楚公鐘號姜鼎亦一德格天  
閭中之物其餘數十種則朱敦儒劉炎張詒洪邃等人所  
藏其方城范氏古鐘及木葉楚公鐘迺石公弼所藏北宋  
搨本復齋得之續於冊後者也因備錄以存其姓氏  
洪邁著容齋五筆內載唐平蠻碑以證明皇之用內侍高守

信主兵柄不始於肅代之用魚朝恩吐突承瓘也駁正博古圖謬妄之說一書再書又古鑄于三代鐘鼎銘識攝尊象尊宋十八鼎皆論之甚詳則文敏之研究金石亦何減於文惠乎

羅泌著路史有宋公成之鐘鐘說及劉耽篆呂梁碑考二篇考證極詳

李丙類其所有金石起夏后氏竟五季著於錄者千卷號博古圖正訛見張湜雲谷雜記湜亦留心金石雜記中歷敘歐陽公集古錄曾南豐金石錄趙德甫金石錄葉石林金石類考洪文惠隸釋續及李氏博古圖正訛諸書并力辨石鼓之出於周宣王可信近時韓元吉以為成王時物未

### 積學書藏

可遽以為然若任汝弼以石鼓文其端皆利因秦篆書以漆之故推為秦時物更非所敢聞也其論頗正故並錄之姚寬字令威著西溪叢話三卷考證典籍外亦及金石曾上會稽尋秦刻石無所得自小邈至鵝鼻山頂有石如屋大中楠一碑於其中文皆為風雨所剝當是秦碑非始皇之力恐不能致此也又載詛楚文有三本說甚詳備東魏大覺寺碑陰題銀青光祿大夫臣韓毅隸書蓋今之楷書也知唐以前皆謂楷字為隸歐陽集古錄誤以八分為隸書也惟以漢石經為三字魏石經為一字則考據未詳耳朱子少好古金石文自恨家貧不多得出先世所遺蓋以已所搜不過數十種為橫軸懸壁凡循行臥起恒不日以為

樂又以石鼓文有似車攻甫田詩推為宣王時作見詩傳遺說

王休著嘯堂集古錄二卷聚古器款識各以今文釋之

王象之輯輿地碑目四卷以天下碑刻地志之目分郡編次而各註其年月姓氏於下起臨安訖龍州皆南渡疆域象之著輿地紀勝二百卷傳本甚少此碑目即從紀勝中摘出單行

陳思輯寶刻叢編二十卷多刻古碑之目與王象之輿地碑目畧同然象之自河淮以北槩屬闕如唯是書於諸道郡邑綱分日析沿革釐然竹垞先生曾欲採所引隸續以補洪書二十一卷之缺

### 積學書藏

鄭樵輯金石畧又有集古系時錄系地錄二書因石鼓文以殿為也見於秦斤以丞為丞見於秦權謂是秦篆以石鼓為秦時物起于任汝弼而來滌為揚其波矣

婁機著漢隸字原以漢魏碑字依韻書分為二百六部編為五卷引漢碑三百有九魏晉碑三十有一各紀其年月地里書人姓名文字異同間有考證不僅為書家取法已也程大昌輯雍錄有石鼓考以為成王時作甚辨核又其所著攷古編中以瑯琊臺碑文證秦以前已嘗石刻亦精確

史子堅字勤齋好古博雅生平精於篆隸行草殘碑斷刻靡不搜訪自集隸格一冊以補洪景伯漢隸之缺馮熙二年邛州蒲江縣僧院中得石刻二十九字云永熹元年二月

十二日蜀郡臨邛漢安鄉安定里公乘校官掾王幽字珍  
儒勤齋釋其為漢隸無疑公乘校官皆漢制也惟永熹之  
號不見於史考冲帝即位所改之元史傳相傳以為永嘉  
止一年熹與嘉文字易貿亂是年帝甫二歲梁太后臨朝  
按說文熹者悅也取喜悅以名元而冠以長久其太后之  
意歟况熹與熹古通用安知不與延熹熹平光熹等年號  
同耶是亦校讐者之誤改說甚辨博孫繩祖著學齋佔畢  
四卷內載石室壁間刻古聖賢表夫節婦及車馬人物即  
武梁祠石象也今錢塘黃小松司馬於嘉祥縣之紫雲山  
按得之而繩祖謂此碑在資州宅博雅堂下剽聞又輦運  
真之明新豈當時蜀中有翻本耶又以梁高行至范且為

### 積學書藏

第一碑伏羲至樊於其頭為第二碑使者長婦兒至縣功  
曹為第三碑皆足以資考核按繩祖因其大文隸格中所  
錄是碑後護漕攝憲梓部行部至資州得碑立所在遂識  
其事

晁公武著石經考異取蜀石經與後唐板本參校之經文不  
同者三百二科著石經考異亦刻於石張真又校註文同  
異為石經註文考異四十卷張氏又刻古文尚書於石又  
范大成有石經始末記

趙彥衡著雪麓漫鈔載國山碑以今文寫之不免訛舛又周  
必大著汎舟錄亦述是碑并辨碑詞載所遺官姓名無周  
處以史為誤

曾宏父著石刻鋪敘先敘高宗御書石經及蜀石經頗詳備  
餘俱論帖又趙希弁蜀石經考其所錄經註字數與曾氏  
畧有增減即引石刻鋪敘為證

楊文昂著周秦石刻釋音載石鼓文詛楚文秦嶧山泰山諸  
碑

施宿著石鼓文音以先後所得北方之本及石林葉氏本訂  
其筆意以成是書

姜夔著保母甄跋甚詳核

章樵注釋古文苑以所載石鼓文取薛尚功鄭樵王厚之施  
宿諸家之說雜錄為一編後潘迪謨音訓都所採取

陳樞著負暄野錄二卷其上卷多論石刻

### 積學書藏

陸游跋唐昭宗賜錢武肅王鐵券文

張世南著宦游紀聞內辨古器款識及顏色制度極詳備又

趙希鵠著洞天清錄其辨古鐘鼎彝器更精審陶南村推  
二書之論古今為粲然具備洵不虛矣因並錄之

王應麟輯玉海藝文門歷代石經俱有論次器用門述鼎彝  
尊彝之屬徵引甚為詳備又所著困學紀聞小學門論金  
石八則更精確

李燾撰長編載嘉祐六年三月以篆國子監石經成賜草澤  
章友直銀百兩絹百疋除試特作監主簿辭不就故有是  
賜策北宋篆石經尚有謝餗張次立楊南仲皇姪克繼等  
或賜銀幣或賜出身見宋史玉海所錄長編未載又朱翌

云本朝石經胡恢所書此又為玉海諸書所未載除王應麟已錄外而未翌之述石經亦當附見者也

周密著雲煙過眼錄四卷續錄一卷於古器畧品甲乙而不甚考證記嘉祐石經云羅壽可游汴梁見太學九經石堆積如山一行篆字一行真字

金

耶律隆有修葺石經功明安世鳳曰石經自漢以蔡邕名今并其拓本亦不存唐庠注孝經始刻石立臺而表章之功不足償離經之罪惟文宗以羣經刻于碑院至今嘉惠學者乃經宋中葉之亂淪于燕幾不能存迨正隆四年方為耶律隆所修則石經之所以長至今日者皆其功也其記

### 積學書藏

字仿石經亦稍形似案安氏所云耶律隆修經事似指唐石經言但所謂淪于燕幾不能自存考唐石經未嘗移至燕朱竹垞檢討經義考引安氏說在金太學石經下作按云金時石經未審何年所刻殆移自汴京與石鼓同掘其說則耶律隆所修者宋嘉祐石經也然遷徙事亦無明徵即金史劉彥宗對二帥語恐有其言而無其事况明陳永之署開封府庠事猶及見宋太學中經碑石今則沈於黃河淤泥之下矣亦檢討案中語也前後未免矛盾然則安氏果何所指耶

元好問著故物譜其說畧曰三代鼎鐘其初出於聖人之制今其欵識故在不曰永用享則曰子子孫孫永寶用豈聖

人者超然遠覽而不能忘情於一物耶自莊周列禦寇之  
說出遂以天地為逆旅形體為外物雖聖哲之能事有不  
滿一呷者况外物之外者乎然彼固未能寒而忘衣饑而  
忘食也則聖人之道所謂備物以致用守器以為智者其  
可非也耶

元

王暉著秋澗集推夏承碑為中郎筆集中跋蔡中郎隸書云  
中郎本取秦相斯大小篆為八分實秦隸書也近觀公建  
凝三年所書五官功曹掾夏承墓表真奇筆也如夏金鑄  
鼎形模怪譎雖蛇神牛鬼<sup>雜</sup>百出而衣冠禮樂已胚胎乎  
其中所謂氣凌百代筆陣堂堂者乎至元辛未中秋前二

### 積學書藏

日觀又暉有修理大都南京石經事狀

王楫以元初都城廟學燬於兵取舊樞密院復創立之春秋  
率諸生行釋菜禮仍取舊岐陽石鼓列廡下見元史周櫟  
園云石鼓迄今無恙楫功也帝京景物畧載石鼓原流不  
及楫按石鼓大觀中歸於京都辟雍又遷置保和殿金填  
其文金人得汴梁鼓亦北徙留王宣撫宅宅後為大興府  
學虞集助教成均言於時宰得置之國學大成門內見伯

生自記

申屠致遠元初官杭州路廉訪經歷時西僧楊璉真伽取宋  
高宗所書經石壘塔致遠力爭而止南宋石經之存於今  
致遠力也致遠壽強人素有文名蓄書甚富號為墨莊

趙孟頫藏復齋所輯欵識用大雅印章兼書薛尚功攷證於  
曾侯後鐘冊首鐘鼎欵識四篆字亦其所書於時錢德平柯  
九思王蒙陳惟寅均賞鑒是冊有圖記

徐碩謨至元嘉禾志三十二卷碑碣一門多至十一卷金石  
文字考證最詳

吾邱衍著學古編為篆刻印章而作又周秦石刻釋音以楊  
文昂著周秦石刻釋音中所取瑯琊碑不類秦碑不應收  
入因重加刪定以成此書

潘昂霄著金石例十卷案蒼嶢此書專示作文之式非考訂  
金石也然墓志之始條下引王戎墓銘比干銅盤銘延陵  
季子墓銘漢滕公夏侯嬰得定葬石銘墓圖條下引南陽

### 積學書藏

宗資墓石刻字則於古碑亦有引證處不獨取材於昌黎  
集也

張淑釋比干銅盤銘延祐間衛輝路學正王公悅臨摹汝帖  
刻於石上淑因釋其文案銅盤銘非必出於比干而文字  
奇古自非漢以後物張淑之釋何可沒其姓氏

吳萊嘗得漢石經六紙證明漢一字石經以息從來浮議因  
賦漢一字石經歌有熹平曆正始洛土重求索衛侯師耶  
鄆三體精筆畫煌然立其西學者常嘖嘖史書竟差舛一  
字幾不覲等句

潘廸著石鼓文音訓取鄭樵施宿薛尚功王厚之諸家之說  
考訂其音訓刻諸石案宋人釋石鼓未有刊石垂諸久遠

者潘氏獨能萃諸儒之說而錙之太學至今與石鼓並列  
後人得以知其音義

陸友精賞鑿工篆隸著研北雜志二卷援北史證馬定國以  
石鼓出宇文周之非於古器頗有考證

單禧著漢校官碑釋文即洪氏釋文而重訂之於洪氏所闕  
者得八字又異同者二字

鄭杓著衍極其第二卷論瘞鶴銘劉有定為之釋更為詳備  
見陶南村輟耕錄

梁有天歷間奉勅歷河南北錄金石刻三萬餘通上進類其  
副本為三百卷曰文海英瀾于濟得漢刻九于泗水中萬  
邈祿廼賢寄九思詩云泗水中流尋漢刻泰山絕頂得秦

### 積學書目藏

碑是也

姚桐壽著樂郊私語一卷內辨六里山天冊碑足資考證  
明

陶宗儀輯古刻叢鈔錄碑七十二種雖無論說而所錄諸碑  
首尾完具多世罕見可備考證

盧熊著國山碑考其考覈視諸家為詳

宋濂考壇山石刻吉日癸巳四字為周穆王書無疑趙子函  
說

朱珪著名蹟錄六卷附錄一卷皆珪所自作文自刻字而輯  
之與古碑無涉然後之欲考珪同時之石刻則於斯編亦  
有所取矣

趙古則著石鼓論以為宣王時作甚為辨核吳坦跋以為獨能脫畧舊聞辨正浮議定為籀文而不惑其高見遠識可謂度越前人什伯矣

吳訥宣德間按浙因宋高宗御書石經向在書院後即書院建仁和學經石殘缺屬知府盧玉潤收拾得全碑及碎折共百片并置殿後及兩廡焉後天順三年改建縣學碑石悉徙至正德間宋廷佐按浙復移置諸石於府學并聖賢圖像及表忠觀碑俱一一分置廊廡間楊一清有記述石經原委頗詳

王世貞著弇州山人四部稿續稿又著古今法書苑七十六卷自四十五卷至末卷俱錄金品石品稿中諸碑刻題跋

### 積學書藏

才學富贍辨論亦精核在明儒中當首屈一指馬孫鑛著書畫跋跋三卷續三卷因元美有書畫跋鑛又跋其所跋故重文見義內有跋碑刻一卷續跋中改碑刻為墨刻

楊慎輯金石古文十四卷錄三代秦漢石刻最富俱鈔列全文如隸釋之例間有跋語漢碑之殘缺者以洪本足之然五鳳墳壇居攝諸刻皆在曲阜係漢碑之近古者俱不錄則又不無遺漏之憾升庵學問該洽而有意翻駁故多踏謬如錄石鼓文七百餘字之類更不足信與弇州有間焉又著法帖神品目一卷自古篆雜碑以及馮化諸帖約百數十種

都穆著金薤琳琅二十卷古碑皆錄全文各為辨證畧仿隸

釋而增隋唐碑文又著吳下冢墓遺文三卷專錄吳中銘志之文凡三十四首

顧元慶著瘞鶴銘考元慶為都元敬弟子所錄銘詞跋語蓋從元敬得之

曹昭著格古要論分十三門古銅器古碑俱有論次考證頗詳張應文著清秘藏二卷亦分門別類於古器皆能審定未存理推明代第一收藏家江南通志云元季明初中吳南園何氏笠澤虞氏廬山陳氏書籍金石之富甲於海內繼其後者存理其尤也著珊瑚木難八卷惜所存俱名蹟而金石尚未裒錄又世傳鐵網珊瑚十六卷亦題存理撰今四庫館定為趙琦美所編趙古則石鼓跋亦載是書其

積學書藏

援引足以資考證

郎瑛著七修類稿五十卷辨證一門畧有考訂金石之文

文徵明檀分隸刻傳雲館法帖然於古墨刻亦有考訂嘗跋

石經畧云小字石經殘本百葉約萬有五千言前後斷缺

無書人名氏余考之蓋宋思陵書也紹興二年帝宣示御

書孝經繼書易詩禮春秋左傳論孟及中庸大學樂記儒

行經解刻石太學孝宗建閣奉安名曰光堯石經之閣即

此是也又漢蕩陰令張遷碑為歐趙洪鄭所未錄徵仲收

得之楊升庵據以入金石古文

沈鎰著岫嶠碑釋文鎰係楚人夢神禹授以古瓶下有篆文

類碑字及早起誦若素識不勞深索楊用修好奇士也

遂信之廼作高碑歌抑亦英雄欺人耳何可據以為實見  
因樹屋書影

楊時喬著岫嶠碑釋文案岫嶠碑釋文共有五家始於楊升  
庵於是郎瑛沈鎰楊時喬杜壹繼之所釋有異同大抵不  
免穿鑿

王佐著新增格古要論十三卷即取曹明仲本增輯之又有  
金石遺文碑帖集

陳曄輯吳中金石新編八卷時通判蘇州因取吳中各碑記  
標題分數凡六門

葉盛著菜竹堂碑目

王行著墓銘舉例四卷為例十三取蒼崖書而廣之補之也

### 積學書藏

趙崑著石墨鐫華八卷積三十餘年之力總所藏二百五十  
餘種裝演堅確每一冊後親一跋辨論皆精博可據

安世鳳著墨林快事十二卷錄金石款識起三代迄於明世  
頗推博雅

盛時泰著蒼潤軒碑跋一卷續跋一卷時泰上元人所紀金  
陵六朝諸蹟為多案時泰字仲交王漁洋香祖筆記謂其  
家多藏書書副頁上必有字或記書所從來或記他事往  
往盈幅皆有鈐印吳山夫得其手跋魏上尊號受禪二碑  
稱為佳蹟

顧啟元著金陵古金石考一卷以年代排纂各紀所在及誤  
書人姓名

孫克宏著碑目三卷畧仿陳思寶刻叢編之例舛謬甚多劉  
侗作于司直天下金石志序詆雪居曰李翕郝閭頌陝則  
曰冀潁川荀淑碑吳則曰潁不勝舉也

華夏搜羅極富居錫山築真賞齋以儲古碑刻鄧豐人叔嘗  
為作真賞齋賦云夏承婁壽漢碑樂毅東方晉刻牙籤錦  
笈以為藏天球河圖而比重也有真賞齋帖大前本為有  
明一代墨刻之冠人叔名道生原名坊輯金石遺文五卷  
又刻偽石經大學後人嗤為狂生者也

范欽居四明天一閣藏書名重海內其藏弄碑刻尤富顧世  
無知之者乾隆癸卯錢竹汀詹事游天台道出鄞適張文  
魚以鈎摹北宋石鼓文屬范氏而侍郎六世孫葦舟亦耽

嗜法書因言天一石刻之富不減歐趙而未有目錄廼相  
約譔次之自三代訖宋元凡五百八十餘通以時代先後  
為次并記譔書人姓名俾後來有考明碑亦有字畫可喜  
者以近不著錄仿歐趙之例也碑目雖編於近日而收獲  
之勤則出自前人故仍以侍郎姓氏登諸錄焉

項元汴富於藏弄未竹垞檢討跋其所藏萬歲通天帖云子  
京能鑒別古今書畫金石文玩物蓋子京賞鑒極精至今  
天籟閣遺物有其題識者人皆珍之而金石刻亦搜羅不  
少也

周錫珪著唐碑帖跋四卷末附五代楊凝式一碑

趙宦光精小學收藏古刻甚富其石鼓文有篆書手題者今

在張叔米家子均著金石林時地考二卷仿陳思寶刻叢  
編之例編次郡省分別時代以便訪求

歸有光文集中有碑跋六則并金石錄隸釋二跋

郭宗昌著金石史所論碑止五十種辨別真贋具有心得允  
伯長於分隸與盤屋趙子函同有金石之癖當時稱閩中  
二士唯自負太高所以抱經學士頗不滿其書然其精審  
處自不可沒國朝王山史所藏西嶽華山廟碑即允伯  
物向藏華陰東雲駒雲離兄弟之墨莊樓雲駒以贈允伯  
蓋其兄弟皆嗜古收蓄古刻甚多

來濬著金石備考十四卷裒輯甚草畧然漢安仙集字歷來  
金石家俱未著錄孫退谷見其榻本而未審石在何處獨

積學書藏

來氏載之云在四川簡州道遙山石窟中

徐獻忠輯金石文朱竹翁經義考曾引其所著吳興掌故內  
所錄高宗御書孝經一則

王家瑞輯咸陽金石遺文

陳鳳梧任河南按察使以宋嘉祐石經八明歸於開封學宮  
殘斷不完立石紀其本末今已無存天一閣尚藏其本其  
記以重勒石經推重宋大儒抑知勒石為楊南仲胡恢諸  
居理學諸儒尚未出也考據之疎如此見全氏鮎埼亭集  
于慎行著筆屢其說漢石經云洛陽石經晉末未嘗損失至  
元魏馮熙常伯夫相繼為洛州刺史取之以建浮屠精舍  
大致頽落聞有存者委於榛莽其後侍中崔光請遣官守

視補其殘缺竟不能行而古迹泯矣視焚書之慘輕重不同其為吾道之厄一也

孫楨著金石評考

陶滋著石鼓文正誤二卷以前人所釋石鼓不免舛謬因親至大學旁挾別刻校定

汪珂玉著珊瑚網古今法書題跋二十四卷皆評論碑帖及名家墨蹟

楊嗣昌輯惠山金石錄


錢受徵著吳越備史錄武肅王鐵券其說甚詳

吳惟英崇禎中與鞏都尉永固留心圖史家有墨響齋摹拓金石文字裝池插架不減歐薛洪趙之富

### 積學書藏

于奕正著天下金石志載古來金石之所在分省及府州縣略註誤書人姓氏年月亦間有所考證末錄無考漢碑百餘種曰直自云考集古金石等書漢碑存者不滿三百版內一百餘版未詳何屬附載以俟詢考然其書半據志乘所有錄其名目安能如郝楊趙鄭之精研其事哉道聽塗說之譏斯不免矣又同劉侗著帝京景物略頗敘石鼓原流

金石學錄卷二終



積學書藏

金石學錄卷三

嘉興李遇孫輯

國朝上

欽定西清古鑑四十卷謹案簡明目錄云乾隆十四年奉

敕撰皆即內府度藏古器繪圖列說體例雖仿考古諸圖而援

據經典辨別款識一一考證精核無所牽合坳會於其間

則萬非諸圖所及也

御製重刻石鼓文序謹案乾隆五十五年

高宗純皇帝臨雍講學見石鼓原刻懼其歲久漫漶為立重欄以

蔽風雨別選貞石摹勒十鼓之文俾海內士人便於椎拓

御製序從韓愈詩定為宣王時物洋洋

聖謨

昭示萬古可以息從前經生家之異議矣

孫承澤著原子銷夏記內有石刻四卷侍郎富於收藏推賞鑒家議論頗稱博洽孫炯有研山齋珍玩集覽及研山齋雜記二書其於銅器亦有考辨蓋承其遺緒耳濡目染具有淵源耳

黃宗羲著金石要例一卷標三十六例以補蒼崖書之缺其考訂較王止仲更密

曹溶著吉林金石表侍郎藏碑之富甲於東南自行塞上始為蒐羅積五年得八百餘本裝界精整有一定之分寸不得稍有參差每冊必手書其籤而校勘之至今人稱為曹籤云

積學書藏

顧炎武著金石文字記六卷又石經考共錄金石文字三百餘種其自序云扶別史傳發揮經典頗有歐趙二錄所未具者非虛語也又著求古錄一卷共碑五十六種每刻必載全文用隸釋之例又潘耒著補遺二十餘條附刻先生金石文記後稼堂受業先生之門於金石亦多所考證

朱彝尊著曝書亭集內四十六卷至五十一卷皆金石題跋考據精鑿與顧氏金石文字記稱抗手繼前賢開後學於兩先生實無愧焉又案先生本有吉金貞石志後併入諸題跋於全集中不復成此書矣又經義考中有石經考日下舊聞末附石鼓考海昌馬寒中住花山築道古樓貯藏書籍金石先生為賦君平遺鏡歌及宋拓鍾鼎款識跋新

莽錢范跋仝里曹仲經好集金石文字先生為作吳大安  
寺鐵香鑪題名跋北齊少林寺碑跋唐騎都尉李君碑跋  
沈菜畦為藍邨先生子工八分愛金石刻先生為作開元  
太山銘跋馬名思賢又姓朱於先生為叔姪曹名曰瑚沈  
名翼俱受業先生之門

吳任臣著十國春秋其於蜀載石經云廣政十四年詔勒諸  
經於石祕書郎張紹文寫毛詩儀禮禮記祕書省校書郎  
孫明古寫周禮國子博士孫逢吉寫周易校書郎周德貞  
寫尚書簡州平泉令張德到寫爾雅字皆精謹

黃虞稷收藏經籍甚富并及石刻說漢石經云漢石經殘碑  
見於洪氏隸釋者尚書僅五百四十七字視孔安國多十

### 積學書藏

字少二十一字不同者五十五字論語載盍毛包周有無  
不同之說公羊亦有嚴顏異同而詩則魯故所傳非毛鄭  
訓故此足貴也

劉凝著石鼓文定本以拓本為主參以薛氏鐘鼎款識其例  
凡拓本全者用圓圍識之仿佛者無圍拓本所無以薛本  
補者用方圍併雜採詩文薈萃成書按劉氏定本竹翁未  
見其書故曰下舊聞不引而舊聞采書目內有趙氏師戶  
石鼓文考注朱氏茂皖獵碣考異二書

張詔承父致中儲藏鼎彝碑版之富詔尤博學嗜古究心金  
石之文後以聲廢而考證彌勤著昭陵六駿贊辨濟州學  
碑釋文又著瘞鶴銘辨親至焦山仰臥而手拓之較宋黃

長睿董道所載多得八字所辨較明顧元慶為詳核又有  
王瑛亦嘗拓此銘而考之屬樊榭陸鶴銘句云張王近事  
僧指說奇險欲動魚龍聽自註云張昭王瑛暴書亭集有  
焦山別銘圖為主副使瑛作

馬驥著釋史內宣王中興錄石鼓文并音訓名物訓詁器用  
門錄古金器六七十種惜無所訂證

傅山誤述未見阮亭先生稱其工分隸及金石篆刻潛印徵  
君稱其長於金石遺文之學每與余語窮日繼夜不止并  
問潛印金石文字足以正經史之謠而補其闕始於何代  
何人因舉七事以對蓋先生為山右老宿學學考古所著  
惜未流傳世間耳

### 積學書藏

王宏撰誤述亦未見先生居華山下為鄆允伯後輩即刻其  
所著金石史以薦舉鴻博至京師所攜漢華山廟碑唐貞  
觀石刻金網經等皆允伯物一時講金石學者皆宗之惜  
其著述未顯因與青圭先生同列以待訪求

鄭籛著各碑跋構園於金陵城東顏曰灌木樓蒐求漢魏以  
來金石碑版時與張大風顧與治相考證分隸為國初  
第一手與竹垞先生先徵士秋錦公稱石交于家及朱氏  
堂額楹帖俱出其手生平臨漢碑最多必有跋尾予家僅  
藏臨邛易令曹全碑一本其跋已刻於觀妙齋金石文字  
考畧中又吳槎客國山碑考錄其天發碑釋後跋借當時  
未有裒集而存之者能無與青圭山史兩先生同一慨乎

王士禎以祭告使秦蜀亦留意金石刻者秦蜀驛程後記王  
樾子東西二闕皆有記錄并記後人題字頗詳核

姜紹書者韻石齋筆談二卷於金石亦有論說

萬斯同著石經考一卷執後漢書儒林傳序為古文篆隸三  
體書法以參校一語欲翻一字漢刻三字魏刻之案則或  
矣後錄唐宋石經較詳於亭林先生石經考亦足補其未  
備爾

閻若璩著潛邱劄記與傅青主論金石學舉七事以對又述  
顏氏廟碑真卿兄弟七人真卿行六碑稱第七子似誤餘  
無論說

臧琳著經義雜記三十卷內說隸續載魏石經左傳遺字中

### 積學書藏

有尚書三篇文後段懋堂大令著尚書撰異亦嘗言及寶  
先生發之也又以熹平石經自洪黃兩家所載外概未之  
見唐張參五經文字上列說文下列石經嗜古之士欲觀  
中郎遺跡不可不讀因輯錄之又說儀尊云毛傳儀者沙  
羽飾古義獻沙聲相近毛詩傳為先秦古書二鄭咸所依  
據後世即出犧牛之尊要不得以此改詩禮之義終是王  
肅好與鄭難故為異說耳其所論皆有獨見

葉奕苞著金石補錄先生自試鴻博放歸專心著述并及金  
石其搜羅考訂皆有根柢漢隸殘碑自然之性百餘字從  
來不見於著錄惟先生書載之以資後人考核亦可見其  
收獲之富矣

程邃嗜古能識奇字嘗為王子底吏部釋焦山古鼎銘辨其  
可識者七十有八字存其疑者八字不可識者七字吏部  
為長歌述之

鍾淵映與朱竹垞太史共註歐陽文忠五代史太史游雲中  
轉客太原訪沙陀北漢故蹟殘碑斷碣靡不摩挲抄撮廣  
漢亦多所攷證見太史谿州銅柱記跋

毛先舒著思古堂集石鼓跋從程大昌之說以為成王時作  
極為辨核石經亦有考證經義考採之

葉封著雋陽石刻集記二卷時官登封知縣錄境內古碑而  
成此書其辨論推為博洽

林侗喜錄金石文嘗攜拓工歷唐昭陵陪葬地得英公李勣

### 積學書藏

以下十有六碑著來齋金石考三卷錄碑二百二十種其  
說皆有典據弟估著漢甘泉宮瓦圖記并蘭話堂碑目

顧苓有捨影園鐘鼎款識一冊現藏張叔未家朱竹垞檢討  
稱其精隸書嘗過之小塘偕八骨董肆中見鼎彝刀尺款  
識悉能誦之文從字順每款為不可及

葉萬著續金石錄用隸釋例多載全文並著其闕字之數行  
列之式欲以續趙德父之書然編次無法又多複漏

孔尚任藏建初慮流尺作漢銅尺記周尺考周尺辨三篇極  
精核又藏母乙鼎及亞尊等器編入積古齋款識

高士奇雅志好古收獲頗富不獨書畫也藏有秦斤銘一百  
零三字其拓本為積古齋款識所收

宋華鑒賞之精推 國初第一而有力以羅致之書畫之外  
兼及金石所藏宋拓西嶽華山廟碑竹垞題跋所謂驚心  
動魄者也

景日珍著說嵩有金石類一卷

龔翔磨居杭州多收藏築玉璫瓏閣以貯諸物嘗于拓叔夜  
鼎銘二十字積古齋取以編入款識近梁山舟先生藏有  
雞形武丁盃馬秋樂先生藏有伯躬父鼎又趙次閑之琛  
藏有頌壺銘百四十九字即朱竹垞暴書亭集所跋周司  
成壺銘是也又藏彭桓壺銘廿六字二器惜已散去皆為  
積古齋所收此武林金器故并錄之

楊繩祖究心金石之學嘗跋宋拓夏承碑其碑後為吳門孝

### 積學書藏

廉陸謹庭所藏

周在浚著天發神讖碑釋文一卷是碑斷裂頗難辨識雪客  
合其石貫以鉅鐵重為釋文而以諸家題跋附之

鄭元慶著石柱記箋釋因竹垞太史補舊刻之缺而芷畦為  
之牋釋馬太史有序稱其考證詳核廣見博聞洵為不刊  
之書

顧仲清著孔林漢碑考中村為竹翁高弟愛金石偶客濟邑  
留官舍購得孔林漢碑七紙州學碑四紙文多剝落署中無  
金石考諸書對勘逐字揣度註釋稿凡五易而成見自序  
無刊本

陳奕禧著金石遺文錄十卷漁洋稱其書法晉人於秦漢以

來金石文字收弄尤富皆為題跋辨證然綴論唯漢碑稍多唐碑以後十不逢一意在錄文而不全在跋也

陳鵬年著瘞鶴銘考康熙四十六年官鎮江知府募工出石於江中隘之焦山亭壁間其石分而為五所存七十七字又不全九字其無字處以空石補之益為完善此碑若非文恪安得復顯於世乎

汪士鋐著瘞鶴銘考一卷此碑張力臣得字六十九陳滄洲搜石出後存七十七字又不全九字退谷備采昔人之論并引張說而折衷之以陳所出石本為圖列諸卷首彙為此考搜羅極稱詳盡

查慎行勤考訂嘗於馬氏道古樓見宋王復齋所藏鐘鼎款

### 積學書藏

識冊內周叔姬鼎季嬭鼎麻城鼎癸亥父己禹鼎凡四器古篆為之訂正詮釋字義皆能精當

吳涵石門人康熙三十一年任順天府府丞移李北海書李秀殘碑七礎於文丞相祠作雲麾將軍斷碑記吳君保護是碑其功甚偉使後人猶得以殘闕摹本共相珍玩朱文藻碧溪文集曾有敘論極稱之

王著著天發神讖碑考陽羨國山碑考二種第概有天發神讖碑補考其所作此碑賦注日為天紀碑非也即補考中亦有誤處

王澐著虛舟題跋竹雲題跋吏部以工書名海內跋尾皆其臨摹古碑帖時所書半以論書法之優劣然史書之闕繆

亦皆辨證則又同於歐趙之用心也陳焯亦精考古吏部  
題跋遺稿賴其撥藏付梓以成完書張文魚金石契中錄  
其兩書錢說甚確當又石鼓釋存中亦引其說

蔣衡每得古碑必跋而鑑賞之其臨摹之功不減虛舟吏部  
手書十三經進呈已邀刊石於太學更為稽古之榮

秦伯厓收藏之富甲於關陝藏石刻文有千種俱裝大冊每  
冊前有石刻八分書大字裝首係其子繼成之者積古齋  
款識錄其師西敦益銘各一百零八字手搨本

何琦留心金石遊曲阜得孔褒碑於郊外水濱因載歸於廟  
自題字於碑陰金壽門云琦字禮康居閩中雍正年間人  
楊賓著鐵函齋書跋大瓢深於考古其所論列皆有證據

### 積學書藏

翁萬年收藏古刻甚富每多題跋

何焯深於考據金石之學時有題跋散見各碑

顧藹吉著隸辨八卷婁機以後續出之碑悉為採掇後附碑  
考二卷碑之存者註今在某處亡者引某書云在某處具  
有引證與婁機字原可以相輔而行

萬經著分隸偶存內有漢魏碑考僅二十一種而論多詳核  
褚峻著金石經眼錄千峰自為摹圖牛階平補說以已所親  
見之碑縮於邊幅而摹勒之共碑四十有七斷跌殘碣之  
形雨蝕苔侵之迹無不在日自有金石書以來未有此製  
千峰實為創體也

牛運震贊成褚千峰成金石經眼錄而為之說復每碑為之

贊殊為蛇足後得巴里坤新出裴岑紀功碑改名金石圖  
下卷益以魏吳以下迄於唐六十圖但於一碑之中約取  
數十字而其說於其上大不比前刻之精善耳

吳玉搢著金石存十五卷目一至五篆碑自六至十五隸碑  
共一百二十通俱錄全文惟易篆隸為楷耳考據皆能精  
博向有鐫本為波臣取去後李雨邨觀察於京師琉璃廠  
書肆見鈔本題鈍根老人編不知鈍根為何人以金石癖  
名其書梓之後王述庵司寇又誤語以鈍根老人為博學  
鴻詞趙搢雨邨遂以其書為趙搢作列入函海竟不知出  
自山夫先生著述也近李芝齡侍郎重刻金石存於浙江  
學政署徐堅字竹友吳門人與山夫先生友善嘗從淮陰

### 積學書藏

市上購得唐唐興寺碑以示山夫錄入金石存山夫稱其  
年少好學嘗從予處見所藏篆隸祕本皆手錄以去且精  
於讐勘丹黃燦然將來所請正未可量也因附錄之

杭世駿著石經考異二卷似未見李野先生書而為之者二  
家詳略互見亦足補亭林先生所未備而更加詳密爾又  
趙信有石經說以漢石經公羊穀梁皆無正經故魏邨鄆  
瀉書春秋正經以補之即唐志所云今字石經左傳經也  
符曾亦有石經說以唐石經補刻之字係尹玉羽蓋移石  
之舉皆出玉羽力也其說皆有獨得即見考異所引

厲鶚金石無專著然其考訂每有精核處如杭堇浦石經考  
異考核已極精博而樊榭為之序又引何休公羊傳註證

漢石經為一字引孔穎達左傳疏證魏石經為三字以補其所未及又集中觀廣政石經詩景初帳構銅等作俱有考訂不獨以韻語見長也

丁敬輯武林金石錄徵君愛金石如性命窮巖絕壁手自摹拓證以志乘成此書于傳亦好古有天監八年甄跋

金農研考金石刻所藏多異本漢征西大將軍楊瑾殘碑十餘字為歐趙洪婁諸書所無壽門獨得之吳山夫據以錄入金石存久西嶽華山廟碑亦有拓本殘缺止十餘字餘或筆畫小損皆可辨認篆額六字亦全較勝於鄔允伯所藏缺百二十字之本亦見金石存

倪濤著六藝之一四百六卷分六集首列金器款識石刻文

### 積學書藏

#### 字二集

李光映輯觀妙齋金石文字考略十六卷子中上舍富而好禮篤嗜墳典金石出所藏碑六百餘種延同里金心齋介復佐其輯錄王華邨籍渠為之繕寫心齋為竹垞太史高弟華邨為邁人方伯曾孫皆老儒宿學有所師承共采金石之書及地志文集說部之類不下百種實開王司寇萃編之先聲唯辨證絕少意在論碑帖法書而存古人之說耳然裒錄之功亦鉅矣其書自是可傳

全祖望著鮚埼亭文集其正集三十七卷後外集三十五卷多石刻題跋以石鼓文為必非秦以前物不意謝山而出此言也

汪師韓著韓門綴學論金石八條  
齊召南有錢武肅王鐵券考畧

姜任修富於收藏漢鄧有道碑久無傳本傳青主鄭谷口兩  
先生所摹本多不厭人意於是日賴亦摹刻之自謂從寒  
山趙氏拓本摹得又摹得北海孫氏所藏石經殘碑得中  
郎筆法以吳炳補桐柏碑之例重補此碑又袁逢曹全諸  
碑皆有摹本

汪由敦著松泉文集所有碑跋皆能暢達其說

黃華蕃輯恒山石墨考

盧文弨著抱經堂文集其十五十六卷多碑跋

錢大昕著金石跋尾四冊先生學問無一不精到此書在潛

### 積學書藏

研文集之外王充祿稱其盡掩永叔德父元敬子商林亭  
竹垞虛舟七家而出其上遂為古今金石學之冠殆非夸  
語

嚴長明著和白齋金石類籤金石文字跋尾石經考異漢金  
石例五岳貞珉考五陵金石志平原石蹟表吳興石蹟表  
等書侍讀以父憂去官尋丁母憂免喪後引疾不出築室  
五楹顏曰歸求草堂藏書三萬卷金石文字三千卷日吟  
詠其中後應畢中丞之招得游太華終南之勝所得金石  
刻益富子觀著金陵石刻記錢竹汀詹事序之稱子進濡  
染家學其於金石刻殆廢寢忘食以求之尤以金陵桑梓  
之地訪而拓之始漢迄元以時代為次錄其全文附以考

證合一府七縣凡若干種

翁方綱著兩漢金石記二十二卷前列年月表十八卷附魏  
吳石刻八種十九卷隸續補急就章註二十卷隸八分考  
二十一卷補遺未附班馬字類記議論堅卓斷制詳明既  
刻後隨有剽改晚定本尤見精核唯間以詩歌附入與歐  
趙之體又異爾視學廣東又著粵東金石畧子樹培著石  
峰草堂鐘鼎考古錢彙考藏有叔丁大林鐘又吳門陸恭  
富於收藏有宋榻夏承碑攜至京師以眎章谿先生為之  
考論其本來借臨十日而歸之

王鳴盛著蛾術編百卷其目有十曰說錄說字說地說制說  
人說物說集說刻說通說系蓋仿王伯厚顧亭林之意而

### 積學書藏

援引尤為博贍光祿與錢詹事為內兄弟兩人同居燕邸  
每得一碑輒互出以相品騰及先後歸田詹事先成跋尾  
光祿為之序云未暇別成一事後是編成其論金石諸篇  
博辨固不讓於詹事也

汪孟錡著考證金石文二卷

錢載藏晉咸和四年甄乾隆初武康人蔡芳逸於屋後培土  
見一穴極深啟之乃古墓墓有七壙皆甄甃兩面無字左  
側有咸和四年八月立七字右側無字上側刻是戊二字  
下側刻一錢有好郭郭外復作四出文籀石侍郎得其二  
汪康古舍人得其一形製款識並同侍郎拓其文貽錢竹  
汀詹事今載其事於跋尾又姜寶節有吳寶鼎甄跋伊湯

安前守嘉興時跋孫吳潘儒南墓甗沈大成跋梁天監八年甗胡虔記漢萬歲甗江德地跋五鳳三年甗

朱筠督學安徽時蒐所部金石遺文得三百餘通成安徽金石志三卷精小學釋羊子戈羊為羊謂羊不上出且子爵無與姓連稱者是羊子為大夫時周文學榘釋為羊謂楚姓今積古齋定羊字

馮浩著孟亭詩文集內有石刻題跋

紀昀學問淵博好金石文字藏周公華鐘銘九十三字其周字甚難識程易疇定為古篆文周字莊進士述祖釋為邦公五等之爵於其國皆稱公也

周春居海昌以進士出宰岑溪歸殿門著書老而彌篤搜羅

### 積學書藏

金石甚富考訂亦精陳默齋騎尉藏古金器有銘太令釋篆文為聶妣妣作安壺六字且審定其物當是嚴仲子為聶政母作也因賦長歌自為注釋

畢宏述與平虛舟蔣湘帆為金石文字文藏古刻甚當作夏承碑考兩漢金石記引其說其碑之真本現為張亦未所藏孫星海曾孫梧俱能世其家學

董金甌精篆隸收藏漢碑甚多并古瓦榻本翁氏金石記所錄長樂未央四字橫書瓦即其所藏物又嘗於嵩山撥剔石闕今所傳少室東闕題名十六字前人皆未之見金甌洛陽人仲子菽憲工篆隸尤好金石碑刻聲家購之所得甚夥築友漢堂貯之山陰童二樹游洛陽曾手摹其華山

廟雙鉤本即鄆允伯本據云此碑之外尚有蔡中郎所書  
楊震宋搨本真絕代寶也

盛百二精考據以進士出宰山左時濟邑人李東琪得斷碑  
於州學戟門內大成殿西階下古樹之根驗隸續知是漢  
膠東令王君廟門碑大令相與訂證為之跋凡得字五十  
九又半字三十二

藍嘉瑄以濟邑學有鄭國碑中一段久埋地中於乾隆四十  
三年掘起尺許得六十字又半字五先是雍正六年李鷗  
於泮池左發得是碑巖下一段凡二十字又半字四皆有  
功於是碑又是年膠州人崔儒昧得故廬江太守范府君  
碑額於濟邑龍門坊水口今移學宮戟門內

### 積學書藏

#### 金石學錄卷四

嘉興李遇孫輯

國朝下

畢沅著關中金石記八卷尚書再泚陝西又兩攝蘭州之節  
裒各郡邑前後所得金石刻七百九十七通始秦漢迄於  
金元鈎稽經史抉擿異同條舉而件繫之以成此書雍涼  
之奇秀畢萃於是矣撫河南輯中州金石記五卷搜採亦  
極精博撫山左與阮雲臺師又同成山左金石志

黃叔儼輯中州金石考八卷為河南開歸道時所輯專錄中  
州諸石刻以各州郡縣編次自商周至元時蒐採頗富唯  
所載金石不註存亡據前所述概為錄入亦非紀實之

意

劉青藜著續金石錄四卷計跋一百餘首頗有辨證

武億著授堂金石跋有正跋續跋三跋考訂精博亦潛研之  
流亞也又輯偃師遺文記晉關中侯劉韜墓志石今藏其  
家

王昶著金石萃編百六十卷侍郎弱冠嗜金石及宦遊所至  
無不訪求自三代至遼金積千五百通而甄錄之其文漫  
漶見於他書者則為旁註以記其全篆隸及見古文別體  
者摹其點畫加以訓釋凡題額碑陰兩側亦必詳載碑制  
之長短寬博取建初慮儼尺度其分寸并志其行字之數  
諸家題跋見於金石諸書文集所載者悉著於編金石之

積學書藏

書至此可謂集大成矣

謝啟昆輯粵西金石畧十五卷自晉至元錄碑四百八十餘  
種後附銅鼓考又因崖谷榛莽中搜討所未及或其石  
已亡而世有拓本作待訪碑目附於末

石韞玉喜蓄古今金石文著獨學廬稿初稿內有石鼓文辨  
會谿銅柱述二篇二稿內有碑跋三十餘則

孫星衍輯寰宇訪碑錄及六朝金石考觀察少游陝幕與錢  
獻之洪稚存兩先生佐秋颿制軍成關中金石記一書切  
廟有素後致仕歸准以著書為樂博通淹雅海內宗之平  
生搜羅三代金器及漢魏以來石刻不少藏有楚良臣余  
義鐘七十四字有釋文與所藏虞彝四十一字皆為積古齋

欵識所收顧廣圻精考訂之學與觀察交甚契合觀察因陶南邨古刻叢編隨得隨鈔難於觀覽欲用時代重編屬其校刊之予見三跋皆有考證并識其古刻第二行四篆字為淮西道院引夏竦古文四聲韻說文八部奚重文院為證甚為精確後延至金陵館舍襄校各書李貽德性嗜金石文凡古刻入手即博採經史以考證之久館金陵為觀察高弟吳修精鑒賞亦與觀察友善所藏金石摹本俱觀察為之題識唐處士包公夫人墓誌甄趙晉齋得之西溪今藏思亭切思怡齋

洪亮吉嘗客畢尚書幕佐成關中中州兩金石記自謂金石之學素寡究心而輿地之嗜幾於成癖每假尚書碑數百

### 積學書藏

通校史傳闕遺其間得史文之誤者十之三以史文正碑石之失者亦十之一又謂金石之失有即可以金石正之者歷舉古碑以證明之又推鄺善長於金石學獨能見其大見所作兩金石記後序

阮宮保元輯積古齋鐘鼎彝器欵識與薛氏同其體例而精博過之近時講金石之學者金少而石多吾師此書專以欵識名為薛氏後不可缺之書薛尚功所輯共四百九十三器而積古齋有五百六十器之多絕後超前殆無其匹所著學經室文集亦多考證金石之文又重摹天一閣所藏北宋本石鼓文西嶽華山廟碑又石經儀禮考皆有功於金石視學山東時成山左金石志二十四卷撫浙時復

輯兩浙金石志朱為弼酷嗜古金文字師稱其能辨識疑  
文稽考古籍國邑大夫之名有可補經傳所未備者偏旁  
篆籀之字有可補說文所未及者開府兩浙招至節署贊  
成款識一書又師輯山左金石志引朱朗齋及何夢華為  
助同事者除武虛谷段赤亭顏運生桂未谷李鐵橋俱另  
見外尚有江鳳彝陸繩李伊晉師稱其雅志好古藏獲頗  
富曾任城太守孫夫人碑即江樞香於新泰縣張孫莊搜  
得始傳於世

黃易著小蓬萊閣金石文字秋盦司馬嗜奇好古每游一處  
必訪求古碑之存亡於濟邑州學扶升鄭固碑得拓其全  
石復於嘉祥縣南之紫雲山得敦煌長史武班碑及武氏

### 積學書藏

石闕銘遂盡得武氏石室所刻畫像又得孔子見老子象  
及祥瑞圖石刻於是移孔子見老子象一石於濟邑州學  
而萃諸石即其地為堂垣砌而堅之榜曰武氏祠堂俾土  
人世守焉厥功甚鉅襄其事者為州人李東琪洪洞李克  
正南明高正炎贊同著搜碑之勞云東琪於乾隆己酉暮  
春督工拓碑復得范巨卿殘碑於樞星門西壁根不禁狂  
喜遂移與先得之額並列焉爰為之記翁覃谿先生寄李  
鐵橋兼呈秋庵詩有任城寶墨熊光起天意助成黃與李  
之句又父己酉鼎銘二十八字積古齋收入款識即東琪  
藏物也

桂馥著札樸十卷大令學問精到博通經史考據是其擅長

札樸第八卷論金石文字頗詳審此書大令歿後刻於淞江前之碑石題跋見於各書者已不少其所藏右軍戈編入積古齋款識

孔繼涵藏有周芋子戈所著微波榭遺書內宋石經記一篇幾及三千言考證最詳言石經遷徙變置者五其殘缺散佚皆由於此非楊璉取之去也未檢討石經考於刊刻後先字行增損碑數移置廢葺未能通核折衷之

顏崇榘博學嗜古收藏宋載公戈周距末阿武戈等器俱編入積古齋款識又藏宋印六孔紅谷為記之其距末不知何器銘八字小篆用金填畫沈心醅據戰國策蘇秦說韓王曰谿子少府時力距來皆射六百步之外釋此為弩飾

### 積學書藏

錢大昭為竹汀詹事弟學問淹博著書甚多曾刻可廬著述序例一冊其於金石亦有考訂桂未谷所藏右軍戈銘十四字先生以篆文奇古非東漢人所能及定為秦器說甚詳核子東垣繹何皆精考據東垣著嘉定金石考二卷自元以上皆錄全文附以考證不豐宮瓦考見研經室文集所引繹著小廬隨筆亦有校正金石文何為王述庵司寇所賞識招至三泖漁莊昇以編校之役萃編之成與有功焉其所釋碧落碑考證精博即載萃編

程瑤田著通藝錄易疇考廉係歛產精考訂之學者述皆有根柢通藝錄中跋夏承碑一通極詳核又積古齋款識中屢引其說象形向兵周幼衣弁立戈父癸鼎諸器皆有釋

文

秦恩復篤嗜古金所藏都公敦曾中盤冊父考盍陽嘉洗孔  
文父鐘陽泉使者薰壚等器及舊拓款識俱為積古齋所  
收

沈可培世居嘉興竹林里以進士出宰上高及安肅與兄可  
均俱留意書畫及金石文字大令著述甚多藏有尚父乙  
解子銘彝亦精考古有寶正執記

金德興嗜書畫金石賞鑒精核居桐鄉築桐華館於徑廡堂  
之東偏以儲古物藏平陽封宮舉契岳鄂王祠銅爵一時  
題詠甚多又藏賈秋壑所刻鍾太傅宣示表原石今歸張  
叔未家又藏吳越忠懿王金塗塏一版可據以正周蓄谷

### 積學書藏

朱竹垞兩先生說之謠同時陳默齋騎尉亦藏錢氏金塗  
塏四面俱全足資考證默齋又藏宗周鐘百二十字與鄂  
巖之舉契皆編入積古齋款識又蕭山祇園寺有周顯德  
舍利塏蔡雲白茂才為之記陳名廣凝蔡名英

朱楓輯雍州金石記又秦漢瓦圖記古金待問錄

程敷輯秦漢瓦當文字其所藏舊榻款識皆編入積古齋嘗  
釋王莽時八風壽存當凡以正朱排山釋為益壽存當之

誤

申兆定陽曲人以孝廉官終白水縣知縣著涵真閣漢碑文  
字跋平生癖於金石到處搜羅善八分手摹漢碑數十種  
將刻石未果

巴慰祖歛人少好刻印務窮其學旁及鐘鼎款識秦漢石刻  
遂工隸書故富家中落賣其碑刻尚三千金然其愛之彌  
甚節嗇衣食時復買之藏有漢劉熊碑雙鉤本凡二百十  
八字內多洪氏所闕者四字少四百十一字并有釋文  
汪中江都人自言十四五歲即喜蓄金石文字誤述學內外  
篇孫淵如先生信馬定國之說以石鼓為宇文周時物容  
甫作五證辨其非無不精確所著漢鴈足鐙槃銘釋文又  
王基碑雲麾將軍碑高府君墓誌諸跋尾皆詳審而考證  
之藏劉熊碑宋拓本多出巴子籍本者二十八字補洪氏  
所闕者十三字正其誤者一字東漢射陽畫像石亦藏容  
甫家海昌俞思謙因近人汪韓門周耕厓皆信馬定國以

### 積學書藏

石鼓為宇文周之物著五可疑以糾正之亦極博辨載孫  
氏讀書脞錄惟又以為秦文公物凡鼓文中所云天子者  
俱祝平王之詞未免多此支節予以為石鼓之指為宣王  
時作在唐人自有相承舊說猶詩之有小序後人凡說皆  
可廢也

張埴所論古碑皆有考證兩漢金石記屢引其說

陳以綱著竹葉碑釋文凡六十餘字兩漢金石記述之并載  
其跋以綱海昌人以諸生終游京師與覃溪先生為金石

交

陳鱣精考證之學築果園於硤石山麓藏經籍金石數百種

著松研齋隨筆兩漢金石記錄其吳國山碑跋同時海昌

之言金石者有陳均能識鐘鼎篆文徧游都門關中江右  
粵東等省收獲日富築十三漢鏡齋以居徐紹曾為周松  
霽大令弟子愛石刻日以摩挲古碑為樂藏北宋二體石  
經周禮殘本實為罕覩松霽大令任岑溪時土人掘山地  
得銅鼓一面底俱平底有銘古篆陽文人不能識攜搨本  
歸命壽魚考釋得四十字五韻有龍集庚午月建在卯云  
云共服其博奧許棧亦究心古學吳山夫金石存李侍郎  
屬其校而刊之藏有千秋長安駘蕩萬年二瓦當為孫淵  
如觀察所未錄

丁杰精考核以漢太學石經稱鴻都石經者誤著辨正之兩  
漢金石記引其論石刻甚多皆有所訂證

### 積學書藏

李文藻為錢竹汀詹事主試山東所得士生平愛聚書於金  
石刻搜羅尤富所過學宮寺觀巖洞崖壁必停驂周覽有  
僕劉福壽善椎拓搨紙墨以從有所得則盡拓之宰粵東  
時嘗乘舟出迎制府小憩南海廟命僕拓碑東燭竟夜比  
曉問制府舟已過矣其風致如此見詹事所作李南澗墓  
志銘又嘗于拓廣州光孝寺龔澄樞造鐵塔記及造千佛  
寶塔記以正朱檢討所謂劉鋹所鑄二塔竝立一屋中一  
作記一題名之誤

李調元著蜀碑記補因王象之輿地碑目所載東南十六路  
於蜀刻尤加詳細其摭取尚不無挂漏之嫌雨邨補之每  
卷先以王所得列於前為上卷而以已所得列於後為下

卷共合為十卷又於下卷中分王本所未有而增入者曰  
補王本所已有而釐訂者曰考俱遵 國朝郡縣名牒之

汪照著古石瑯玕

王復為毅原先生子以考職出為宰受知畢秋颯尚書為作  
晚晴軒詩序性愛金石令偃師時以邑人武虛谷先有滙  
師金石遺文錄四卷秋媵續補之廣為十六卷山陰童二  
如鈺精考據延至幕中相與訂證引其說頗多其書刊於  
中州嘉慶庚申修嘉興府志時不列於金石類余從鍾映  
淵敬濤處假得始著於錄映淵亦好古士收蓄碑版甚富  
有題跋

陸超曾擅分隸嗜金石晉瓦券跋頗精核藏有吉羊洗蔣心

### 積學書藏

餘編修翁覃溪學士程魚門編修各紀以詩

江德量以父于九太守名恂者故好金石之文多所搜輯幼  
即世其學所藏舊疑識拓本約二十種俱編入積古齋書  
中釋散氏銅盤銘述庵司寇稱其精審釋之者又有孔廣  
森樊明徵汪肇龍吳頴芳各有心得

趙秉冲有賜石齋碑錄所藏成都鼎吳彝蓄川太子爐及款  
識搨本六十餘種俱收入積古齋書中

段玉裁精研訓詁之學者說文註等書洪氏隸續載魏三體  
石經左傳遺字蓋即洛陽蘇望摹刻本懋堂大令諦審之  
知有尚書大誥呂刑諸篇文錯雜其間錢詹事稱為向來  
考石經者未之聞也然臧氏經義雜記中已有此說

邢澍據現在所見唐宋以前金石刻並宋元刊本隸釋隸續等書著金石文字辨異十二卷又著西秦藝文志八十卷中錄金石甚多又同孫淵如觀察作寰宇訪碑錄

吳騫著國山碑考槎客以著述為事經籍金石考訂必精以齟業在荆谿每往來其間碑在縣境因訪而釋之又著唐開成石經考異蜀石經毛詩殘本考異所著愚谷文存中亦多金石刻跋又著辨以訂孔東塘漢銅尺記周尺考周尺辨之謠

張燕昌著金石契三吳古甄錄又重摹北宋石鼓文著石鼓文釋存文魚居武原篤嗜古金石築石鼓亭於家中一時名公卿咸與之訂交錢竹汀詹事作石鼓亭記以贈之抱

### 積學書藏

經學士作秋帆尚書關中金石記序略舉國朝為金石之學者十三家起於崑山秀水而終於文魚其推許亦可謂至矣子開福能繼家學著續三吳古磚錄又與文魚賞奇析疑同嗜金石者有吾竹房藏臬伯貞蓋錢柞谿藏石刻甚富吾名進錢名本誠俱海鹽人

錢坫著十六長樂堂古器款識澣花拜石軒古鏡文俱考證精核又習鼎銘釋文乾隆戊戌歲巡撫畢公得於長安即屬獻之為釋文共得一百三十二字所藏款識拓本十餘種俱收入積古齋書中

吳東發著石鼓文辨讀釋文等七種又習鼎銘釋文侃叔人品高潔貫穿經典而於金石亦癖嗜吳槎客稱其好學如

楊南仲博雅如劉原父於秦漢碑版鐘鼎篆籀靡弗鑽研  
蒐討旁通曲暢以證之

溫汝遂古篤嗜金石刻潘有為亦精甄錄皆番禺人粵東為金  
石學者當首推兩君殆歐陽文忠所謂好古而有力者予  
從琅嬛僊館鈔得潘毅堂所藏古泉目自幣貨以迄時錢  
有一千三四百品儘多異聞罕見者可稱收集之勤矣因  
述其會粹金石而及之亦足以見一斑爾張叔未所藏予  
執旂句兵向為毅堂所藏

江藩究心金石文東明尊銘十九字陳逆蓋銘七十七字皆  
有釋文所藏款識拓本皆編入積古齋書中嘗藏新莽貨  
泉范底有母字錢詹事泉母之說本此江聲為之記

### 積學書藏

朱文藻著校訂隸釋存疑及濟邑金石志等書朗齋少為述  
庵司寇所賞識屬其採錄金石諸說以資考證後客京師  
寓韓城王文端公邸第值文端充續西清古鑒館總裁  
得見內府儲藏尊彝古器摹本三百餘種後又客任城  
黃小松司馬署得見濟邑一州古今碑拓數百種繼客濟  
南赴阮雲臺師之招時視學山左徧蒐碑碣得見全省拓  
本千數百種贊成山左金石志後僦游家居適司寇歸田  
將訂金石萃編招朗齋與錢君同人襄其役下榻三泖漁  
莊凡三易稿五易寒暑而始竣事又得見司寇所藏寰宇  
碑摹一千五百餘種自謂畢生能窺金石之美富殆有天  
馬

趙魏著蜀石經周禮夏官殘碑考鴈足鐙銘考金石題跋散  
見各書皆簡核可取晉齋少好遠游搜訪古刻藏碑三四  
千通雖值窮乏實此不失其所藏欵識搨本七十餘種俱  
編入積古齋欵識

陳豫鍾收藏古金欵識甚多積古齋錄其搨本二十餘種  
段松岑著益都金石志又益都孝廉李廓藏紀候鍾積古齋  
編入欵識武虛谷金石跋亦載其器而釋之

聶鉞著泰山金石志

瞿中溶為錢詹事塔好金石有唐雞林道經畧使官印記金  
都統官印記又許宗彥亦有雞林道經畧使印記為雲臺  
師作

### 積學書藏

周廣業輯唐石經補考又著容院錄有都司空瓦考又費士  
璣有瓦當考因錢既勤釋耕為豐定為成周豐宮瓦引鄭  
康成大射儀注為證士璣引漢書地理志新豐縣疑是新  
豐宮瓦文以備一說又吳晉有長樂萬歲瓦跋

曹秉鈞居木城號種梅著元延銷跋載兩漢金石記案元延  
銷即三斗銷向藏嘉興黃大令思堂家後為文後山鼎所  
得後山精鑿別金石亦能考核得此器後即以三斗銷願  
其齋翁暉溪先生為之書扁又兩漢金石記言嘉興姚吳  
齋江春以元延銷拓本並曹種梅跋來京師始載入記中  
并云吳齋少年嗜古倚居京師與予次兒樹培往復考核  
金石文字迺甫歸里而疾卒傷其有志未就因附書於此

俾其姓名託茲編以弗湮也因并錄之

朱邦經著南宋石經考嘗司教杭州府學堯石經碑明正德十三年直指使宋廷佐由仁和移至邵庠現在樞星門內兩廊壁間友雀手拓碑文於每碑標題起訖以資考證計存八十六碑并辨明憲聖皇后代書事出於附會

吳文溥輯南野草堂漢唐石刻目錄澹川客關中時購得漢唐石刻拓本二百餘通鈔而存其日年月州縣誤書人姓氏及文字之全缺無不於目下註之殊為清晰

張廷濟住嘉興新篁里鑿賞精博一古金石入手即能知其真偽別其原流所藏商周秦漢古彝器銘文千種有現今收藏家所未著錄者翁覃谿學士與之往復考論多所辨

### 積學書藏

析所藏石刻自石鼓文以下至宋金亦千種實有數十年舊搨而其石今已全佚者藏器中鐘鼎尊彝之屬六十餘種絕無偽造其周諸女方爵秦始皇時度則寰宇中所僅有者藏石有唐天寶七載修于產廟殘碑顏魯公元靜先生殘石蘇文忠馬券碑舊石賈秋壑所刻鍾太傅宣示表宋時覆刻淳化殘帖金元刻蘭亭諸石皆精出近時覆刻倍倍金石之外所藏如漢晉古甑秦漢古瓦漢魏至宋元古官私印周秦以來錢幣皆不讓古收藏家其為積古齋欵識所收自冊父乙尊以下凡八九器蓋未盡載錄也所著有清儀閣集古欵識考金石刻題跋金石奇緣墨林清話等書叔未之兄灝曾登焦山親拓瘞鶴銘五石共拓

為一大幅并拓出爽塏石下有小字四行十數字為從前金石家所未道弟沅藏有諸女尊祖辛敷二器編入積古齋款識又有永興元年堂狼造之洗晉咸和二年甄翁學士為之銘亦佳物也從子柝藏有山父壬彝未李彝犧形爵樂仲洗大吉羊洗龍虎鹿轡鐙等器一門群從無不以金石名學又葛嵩藏有商父乙觚周華姬鼎遣小子敦漢宜子鐙吳越寶正甄等物王幾藏有周史頌盤王銘壽藏有漢嚴氏洗此皆古彝器之現存其家與叔未第弟稱金石交朝夕切磋互相訂證今其人或存或亡而備錄之以見此鄉多好古之士焉

宋保醅山右孝廉號芝山為翁暉漢學士門下士篤嗜金石

### 積學書藏

老而流寓吳越間東南好古之士無不與之相契所藏古金石刻之至精者皆為張叔未所得

黃錫蕃居海鹽擅分隸亦精於蒐討嘗集諸家散氏盤銘釋文折衷已說彙成一冊所藏款識裝界十鉅冊曾於張叔未紫頭見之今為上海陳寄磻所得者續古印式二卷金石表六卷刻碑姓氏錄一卷

陳鴻壽輯續金石萃編鈕匪石與之同輯丙子冬間晤易生悉已得八卷今易生已亡其書未刻匪石名樹玉曾著說文新考錢詹事序而刊之

嚴可均著唐石經校文

張鑑居湖州南潯鎮精於考古為劉阮二宮保師所深器嘗

著墨妙亭碑目考及古甃記等書其碑目考自序畧云孫公墨妙亭石刻迄今七百載而石與拓本存者絕少余以聞見所及疏而出之有鄭氏崖哇所未知者然亦十纔得其六七耳異日苟有能發府治之沮洳而復樹之則斯錄之逸者存闕者補邑之幸非即此書之幸歟

徐熊飛博雅好古每得武康山中古甃以考核之游焦山手拓無專鼎銘九十四字以歸雲臺師取以編款識

李富孫釋漢唐石經異文及北宋周禮殘碑援據精確又嘗仿王止仲例以洪氏隸釋隸續所載益以六朝人碑製為漢魏六朝墓銘纂例阮雲臺師見之謂碑碣當以漢魏為法六朝猶不失遺意屬其將原文及碑式跋寸並為載入

### 積學書藏

俾古制有所考又鄧慶著金石例補一卷汪選樓序之

何元錫著金石收弄亦多游山左於聖林廡外得孔君墓碣移置廟內雲臺師為記之又以漢刻公乘伯喬題名殘碑貞女龍鳳墓闕永初官整文三種重摹勒石寘於南昌儒學齋廡原刻為趙晉齋所藏今為張叔未購得

翁廣平著金石集錄海邨居吳江之平望鎮博雅好古所跋金石刻各種皆有典據

嚴杰著重樞天一閣北宋石鼓文考宋高宗石經考厚民究心古學為雲臺師所賞識久館節署十三經校勘記等書皆面承指示而助成之又趙春沂亦有天一閣石鼓考孫同元有宋高宗御書石經考金廷棟著石經穀梁傳考洪

震烜著西漢陶陵鼎考俱見詁經精舍文集

汪家禧攻苦力學長七畧之學辨析古籍無豪髮爽於金石亦篤嗜而審核之今所存者惟西嶽華山碑考一篇刻之

東里生燼餘集中

錢泳工分隸攀雲閣帖臨漢隸四十餘種近更縮臨唐碑亦不下百種廣陵鮑氏刊之其致力於金石者深矣又嘗以論語孝經大學中庸分書刻石嵌於蘇州府學壁間

司馬壹居金陵好古多藏弄有東彝琯戈陽武劍諸物收入積古齋款識其琯字程易疇據周公華鐘銘周字比例推詳定為琯之省文

李聘工分隸頗研心金石之學儔厲武原時與張文魚徵君

### 積學書藏

游獲其緒論嘗藏漢少室石闕畫象吳槎客為之跋今歸張叔未又從海濱得五鳳三年甄贈雲臺師攜至京師翁覃谿先生見之為作五鳳三年甄考又藏大吉羊宜用洗載入文魚所著金石契中後歸梅里所藏諸物漸散去無存所著有漢碑奇字漢隸解異等書

戴允曾酷嗜舊碑法帖遇有精本撿采前人題跋語而折衷已說書於後嘗藏郭有道碑係承中褚氏於乾隆四年翻刻之元本褚氏藏此碑已百餘年實為宋拓色澤甚古筆法變化不測非傳青主鄭谷口姜自耘臨摹之本所能髣髴松門購得之於祕不輕以示人余往禾城必到從好齋中縱觀古刻不忍釋手不料辛巳秋闈後一病不起老友

云亡傷如之何因輯金石學錄而附其姓氏為之泫然  
誠良著壽金庵金石款識己卯庚辰間任江蘇糧儲道余與  
張叔未孝廉游虞山之便往訪署齋出視所藏銅器二百  
餘件摩挲終日目不暇給為之定真贋辨文字其收藏可  
謂富矣藏有光緒二年量邊款九十餘字底同側有陽安  
二隸書為金器中絕品又素方伯訥收獲彝器甚富藏有  
叔氏大林鐘與翁宰泉所藏者同文惟氏字明顯不比翁  
鐘字已剝蝕所以著錄者誤為丁字也所藏尊彝等尚有  
十餘事

馮登府著漢魏蜀石經補考以辨古今文之異同唐石經補  
考以正亭林先生某字誤之非俱有疏證辨論極精當又

### 積學書藏

集古彝器及甄瓦遺文搨本為金屑石餘二錄考證古今  
多所發明

鍾振富居桐鄉濮院鎮性愛漢唐碑碣廣為搜羅不下千種  
并金器款識皆精裝求名手書簽以時展翫繪秋夜校碑  
圖題詠甚多趙晉齋張叔未嘗造其廬各出古刻以相質  
證游吳門購得林同人所藏漢魏碑十冊計十六種內有  
方印云闔中林侗手校補并裝於三原學古堂頁版俱同  
人手書碑目摹刻於上精妙絕倫岳洙傳久館於其家同  
嗜碑刻著有石刻攷畧後附漢碑讀字

馬銛居海昌傘墅邨擅飛白隸書收古石刻能審度而辨定  
之所藏古泉不下二千品有極精者游武林購得大泉五

十範一枚背有利主事取工主所予八字陽文隸書精湛  
異常於泉范中稱絕品焉

馬陳潮著續石經考衆諸家之說薈萃成編加案語以補其  
缺而正其非頗費搜錄之勤

劉喜海為文恭公師長子幼愛金石所居書室款識石刻縱  
橫滿几近更尋碑碣之末為萃編所收者意欲續之搜羅  
漸廣必有成書也又葉志詵同居京師與燕亭嗜金石亦  
同所藏款識及漢印甚富

阮亨著瀛舟筆譚內錄金石文三卷

陳經著求古精舍金石圖四卷前摹金器圖縮本頗精工并  
及刀布鑑印剛卯之屬後摹古甌款識圖同時丁曉樓王

### 積學書藏

二樵鈕葦村各藏漢晉古甌數十種俱有搨本流傳丁名

□王名獻鈕名□

徐同相為張叔未孝廉之甥好古能識奇字叔未每得款識  
之難辨者屬其細意融會即豁然通解著崇古堂古金考

古履仁鄉金石文字記

錢汝著上虞金石考錢既勤令上虞保舉應孝廉方正徵稱  
其書按羅頌富考證亦精

周中孚嘗以漢學受知於雲臺師著述甚富以隱修經業著  
印著金石識小錄及杭嘉湖道古甄目

龔時珍仁和閣齋觀察之子著述甚富旁及金石文字藏弄  
八百餘種皆世所不經見惜燬於火

徐渭仁通金石之學搜采漢唐諸刻補王氏萃編所闕者若干卷兼工篆隸李筠嘉有慈雲樓藏書數萬卷金石文字千餘種輯藏書志及金石目梅益徵精於鑒別所搜古石刻足與徐氏相伯仲嘗下榻慈雲樓佐輯金石目等書記大復著古甄品又工篆刻及漢隸俱上海人

陳璜吳人僑居上海癖嗜金石收集鐘鼎款識及漢唐碑版漢晉古甄同貯一室名曰澤古齋著有古甄錄足補歐趙之闕近延武原黃椒升張質明兩君同輯金石萃編補遺金石萃編校勘記續金石萃編夏世堂建安諸生幼隨父宦於上海嘗集漢唐石刻補王氏萃編之闕


馮雲鶴江南通州人官膠州知州刻有續金石圖於山左諸

### 積學書藏

石刻搜採更備

姚觀光能文嗜古搜羅書畫金石甚富藏有夔作尊寶彝敦子牙爵子孫作婦姑鬯彝甗等器築墨林如意之室以貯諸古物蓋六榆先得天籟閣所製鐵如意一柄銘辭二十四字極精好張叔未孝廉為隸書扁以顏之石刻中藏唐刻宋搨黃庭經一本有王覺斯孫退谷何義門諸跋是宋思陵內府物黃庭傳本無出其右向為吾里杜氏所藏後歸嵩湖錢夢廬今為六榆購得夢廬名天樹賞鑑書畫外金石亦尤心焉

積學書藏



金石學錄卷四終

